

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI SELASA : 3 NOVEMBER 2020

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : DATUK ROZMAN BIN ISLI [LABUAN]

TARIKH : 3 NOVEMBER 2020 (SELASA)

SOALAN

Minta **MENTERI PENGANGKUTAN** menyatakan adakah Kementerian sedar terminal feri Menumbok mengalami kesesakan terutamanya musim-musim perayaan. Apakah Kementerian bercadang untuk meningkatkan kapasiti terminal tersebut termasuk membesarkan laluan jalan dan menyediakan tambahan ramp kedua pendaratan feri kenderaan seperti di Labuan.

JAWAPAN

Yang di-Pertua,

1. Untuk makluman Yang Berhormat, Terminal Feri Menumbok merupakan terminal di bawah tanggungjawab Pihak Berkuasa Kerajaan Negeri Sabah dan dikawal selia oleh Jabatan Pelabuhan dan Dermaga Sabah (JPDS).
2. Peranan Jabatan Laut Malaysia (JLM) di dalam perkara ini adalah terhad kepada aspek keselamatan sebelum feri dan *Roll-on/Roll-off* (RORO) berlepas, seperti kawalan muatan penumpang dan keteraturan susunan kenderaan.
3. Justeru, sebarang perancangan pembangunan bagi menaik taraf terminal feri tersebut adalah di bawah bidang kuasa Pihak Berkuasa Kerajaan Negeri Sabah. Perkara ini adalah selaras dengan **Bahagian VI**,

Bab 8, Perkara 95B(1)(a), Senarai IIA, Perkara 15, Perlembagaan Persekutuan seperti berikut:

95b. (1) Dalam hal Negeri Sabah dan Sarawak

- (a) tambahan kepada **Senarai II** yang dinyatakan dalam Jadual Kesembilan hendaklah disifatkan menjadi sebahagian daripada Senarai Negeri, dan perkara-perkara yang disebut satu persatu dalamnya hendaklah disifatkan **tidak termasuk dalam Senarai Persekutuan atau Senarai Bersama**;

Senarai IIA

15. Pelabuhan dan pangkalan, selain yang diisytiharkan sebagai pelabuhan dan pangkalan persekutuan melalui atau di bawah undang-undang persekutuan; **pengawalseliaan lalu lintas mengikut jalan air di pelabuhan dan pangkalan atau di sungai-sungai yang keseluruhannya terletak di dalam Negeri itu, kecuali lalu lintas di pelabuhan atau pangkalan persekutuan; pesisir depan.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 3 NOVEMBER 2020 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI SUMBER MANUSIA** menyatakan apakah **usaha-usaha dan kejayaan** yang telah dicapai oleh pihak Kementerian hasil pengumuman pakej rangsangan ekonomi PRIHATIN, PRIHATIN PKS Tambahan, PENJANA dan Kita PRIHATIN.

JAWAPAN

Tuan Yang di-Pertua,

1. Untuk makluman Dewan Yang Mulia ini, sebagaimana kita semua sedia maklum, pandemik COVID-19 telah memberi impak besar kepada ekonomi global secara keseluruhannya termasuk Malaysia. Kerajaan telah berusaha untuk membendung penularan wabak COVID-19 dan impak kepada sektor ekonomi negara.

2. Bagi menstabilkan ekonomi negara dan membantu majikan yang terkesan dapat mengekalkan pekerja mereka, Kerajaan telah memperkenalkan beberapa inisiatif di bawah Pakej PRIHATIN, PRIHATIN PKS Tambahan, PENJANA dan Kita PRIHATIN.

3. Inisiatif-inisiatif yang diperkenalkan oleh Kerajaan adalah seperti berikut:

- i. Pertama sekali, Pelaksanaan ***Employment Retention Programme (ERP)***. Sehingga 16 Oktober 2020, PERKESO telah menerima 37,901 permohonan daripada majikan yang melibatkan 340,252 pekerja. Sebanyak RM211.33 juta telah dimanfaatkan oleh para pekerja.
- ii. Program kedua adalah pelaksanaan ***Program Subsidi Upah (PSU)***. Sehingga 16 Oktober 2020, PERKESO telah menerima 331,950 permohonan majikan yang melibatkan 2.7 juta pekerja. Sebanyak RM11.9 bilion telah dimanfaatkan oleh para majikan.
- iii. Seterusnya Program Subsidi Upah 2.0 (PSU 2.0), dari 1 Oktober 2020 sehingga 16 Oktober 2020, PERKESO telah menerima 36,910 permohonan dari majikan dan melibatkan seramai 386,000 pekerja.
- iv. Di bawah ***Program Insentif Pengambilan Pekerja (Hiring Incentive Programme)*** adalah seperti berikut:
 - a) ***Program MyApprentice*** - Seramai **4,433** perantis telah berjaya ditempatkan di bawah program ***MyApprentice***;

- b) **Program HireMalaysia** - Seramai **51,020** pekerja berjaya ditempatkan bagi umur bawah 40 tahun ke bawah dan 7,705 orang pekerja bagi 40 tahun ke atas;
- c) **Insentif Pengambilan Pekerja** Tempatan dari golongan **Orang Kurang Upaya (OKU)** dan peserta Program **Return to Work PERKESO**. Seramai **322** Orang Kurang Upaya (OKU) berjaya ditempatkan;
- d) **Bantuan Mobiliti** secara *one-off* kepada pekerja yang berpindah dari lokasi tempat bermastautin ke tempat kerja baharu. Seramai **3,477** orang pekerja telah mendapat faedah melalui Bantuan Mobiliti ini.
- e) **Program latihan** untuk pekerja berdasarkan keperluan majikan. Seramai 7,759 orang pekerja telah mendapat manfaat dari program latihan; dan
- f) Portal **MYFutureJobs** iaitu portal pekerjaan membantu majikan dan pencari kerja mendapatkan pekerjaan. Sejak **MYFutureJobs** diperkenalkan pada 1 Januari 2020 sehingga 23 Oktober 2020, sebanyak **354,297** kekosongan jawatan dan **330,972** pencari kerja telah didaftarkan.

4. Menerusi inisiatif tersebut di atas, Kerajaan telah berjaya mengurangkan kadar pengangguran dari 5.3% pada bulan Mei 2020 kepada 4.7 % pada bulan Ogos 2020. Keadaan ini juga dapat kita lihat yang mana bilangan kes kehilangan pekerjaan juga turut menunjukkan penurunan setiap bulan iaitu rekod kes kehilangan pekerjaan adalah paling tinggi pada bulan Jun 2020 (18,579 kes) dan menurun setiap bulan. Kes kehilangan pekerjaan sehingga 22 Oktober 2020 adalah 5,879 pekerja.

5. Selain daripada itu, Kerajaan juga telah berjaya untuk mengekalkan 2.7 juta pekerja melalui usaha-usaha tersebut di atas. Sehingga 22 Oktober 2020, seramai 87,499 pencari kerja telah berjaya ditempatkan melalui Karnival PenjanaKerjaya.

Tuan Yang di-Pertua,

6. Pada 22 Jun 2020 lalu, Kementerian Sumber Manusia melalui **Pembangunan Sumber Manusia Berhad (PSMB)** telah melancarkan **Inisiatif PENJANA HRDF**.

7. Lima (5) skim telah diperkenalkan melalui inisiatif ini yang terdiri daripada *Place & Train*, *B40 Development*, *SME Development*, *Industrial Revolution 4.0* dan Gerak Insan Gemilang (GIG). Skim-skim ini diwujudkan dengan tujuan untuk membantu rakyat dalam mendapat penempatan pekerjaan, *self-employed* serta menambah dan meningkatkan kemahiran mereka.

8. Setakat 16 Oktober 2020, PSMB telah meluluskan sebanyak 35,938 pelatih bagi mengikuti skim-skim yang melibatkan penempatan pekerjaan dan *self-employment* ini.

9. Melalui Pakej Rangsangan Ekonomi PRIHATIN, PSMB telah menawarkan Pengecualian Bayaran Levi selama enam (6) bulan kepada semua majikan yang berdaftar di bawah Akta PSMB 2001 bermula pada 15 April hingga 15 September 2020. Pakej rangsangan ini akan memberikan manfaat kepada 32,143 majikan dan seterusnya dapat meringankan beban mereka yang terkesan akibat penularan pandemik COVID-19. Levi berjumlah RM480 juta juga tidak dikutip oleh PSMB pada tahun 2020 sebagai bantuan untuk memudahkan aliran kewangan majikan yang terdiri daripada 63 sub-sektor yang meliputi tiga (3) sektor ekonomi utama iaitu Perkilangan, Perkhidmatan dan Perlombongan dan Pengkuarian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB PUAN NOR AZRINA BINTI SURIP
(MERBOK)**

TARIKH : 3 NOVEMBER 2020 (SELASA)

SOALAN

PUAN NOR AZRINA BINTI SURIP [MERBOK] minta **MENTERI DALAM NEGERI** menyatakan sepanjang wabak COVID-19, terdapat ibu warganegara Malaysia yang melaporkan tidak dapat mendaftarkan kelahiran anak mereka tanpa kehadiran bapa bukan warganegara yang terkandas di luar negara. Bagaimanakah pendaftaran kelahiran anak yang dilahirkan di Malaysia kepada wanita warganegara Malaysia ini akan diproses.

JAWAPAN

Tuan Yang Di-Pertua,

Setiap kelahiran yang berlaku di Malaysia hendaklah didaftarkan di Jabatan Pendaftaran Negara (JPN) selaras dengan Akta Pendaftaran Kelahiran dan Kematian 1957 (Akta 299) bagi Semenanjung Malaysia, Ordinan Pendaftaran Kelahiran dan Kematian (*Sabah Chapter 123*) 1951 bagi Negeri Sabah, dan Ordinan Pendaftaran Kelahiran dan Kematian (*Sarawak Chapter 10*) 1951 bagi Negeri Sarawak. Ketiga-tiga undang-undang tersebut jelas menyatakan **tanggungjawab ibu bapa atau mana-mana individu yang mengetahui tentang kelahiran** untuk mendaftarkan kelahiran berkenaan kepada JPN tanpa mengira taraf kewarganegaraan, keturunan atau latar belakang.

Dalam hal ini, pendaftaran kelahiran masih boleh diterima dan diproses khususnya semasa penguatkuasaan Perintah Kawalan Pergerakan (PKP) mulai 18 Mac 2020. Bagi kes pendaftaran kelahiran yang bapanya berada di luar negara akibat terkandas, JPN akan melaksanakan urusan pengesahan identiti berkaitan bagi membolehkan maklumat bapa direkodkan dalam Sijil Kelahiran berkenaan. Sukacita diingatkan agar individu yang mengemukakan permohonan pendaftaran kelahiran berkenaan hendaklah membawa bersama dokumen pengenalan diri ibu bapa, pengesahan kelahiran, Buku Rawatan Ibu Mengandung, dan dokumen perkahwinan ibu bapa anak tersebut.

**PEMBERITAHUAN PERTANYAAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 3 NOVEMBER 2020 (SELASA)

SOALAN

Minta **MENTERI PENGANGKUTAN** menyatakan adakah perancangan untuk mendalamkan muara Batang Rajang di Tanjung Manis kerana kedalaman muara semakin berkurangan disebabkan beting pasir dan mengganggu laluan pelayaran perkapalan di Pelabuhan Tanjung Manis.

JAWAPAN

Yang di-Pertua,

1. Untuk makluman Yang Berhormat, kawal selia alur pelayaran kapal di Muara Batang Rajang hingga ke Pelabuhan Tanjung Manis adalah di bawah bidang kuasa Pihak Berkuasa Kerajaan Negeri Sarawak. Perkara ini adalah selaras dengan **Bahagian VI, Bab 8, Perkara 95B(1)(a), Senarai IIA, Perkara 15, Perlembagaan Persekutuan** seperti berikut:

95b. (1) Dalam hal Negeri Sabah dan Sarawak

*(a) tambahan kepada **Senarai II** yang dinyatakan dalam Jadual Kesembilan hendaklah disifatkan menjadi sebahagian daripada Senarai Negeri, dan perkara-perkara yang disebut satu persatu dalamnya hendaklah disifatkan **tidak termasuk dalam Senarai Persekutuan atau Senarai Bersama**;*

Senarai IIA

*15. Pelabuhan dan pangkalan, selain yang diisytiharkan sebagai pelabuhan dan pangkalan persekutuan melalui atau di bawah undang-undang persekutuan; **pengawalseliaan lalu lintas mengikut jalan air di pelabuhan dan pangkalan atau di sungai-sungai yang keseluruhannya terletak di dalam Negeri itu, kecuali lalu lintas di pelabuhan atau pangkalan persekutuan;***

2. Justeru, peruntukan tersebut dapat ditafsirkan bahawa, pengawalseliaan lalu lintas mengikut jalan air di pangkalan, atau di sungai-sungai yang keseluruhannya terletak di dalam Negeri itu, kecuali lalu lintas di pelabuhan dan pangkalan Persekutuan adalah tanggungjawab Negeri tersebut. Maka, sebarang perancangan bagi mendalamkan muara Sungai Rajang termasuk kerja-kerja pengerukan adalah di bawah bidang kuasa Pihak Berkuasa Kerajaan Negeri Sarawak.

Sekian, terima kasih.

**PEMBERITAHUAN PERTANYAAN DEWAN RAKYAT
PENGAL KETIGA, MESYUARAT KETIGA 2020
PARLIMEN KEEMPAT BELAS**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 3 NOVEMBER 2020 (SELASA)

SOALAN

TUAN NGA KOR MING [TELUK INTAN] minta **MENTERI PERDAGANGAN ANTARABANGSA DAN INDUSTRI** menyatakan jumlah pelaburan asing yang masuk ke negara kita dari Mac 2020 hingga kini mengikut pecahan negeri serta jumlah bilangan pekerjaan yang berjaya diwujudkan.

JAWAPAN

Tuan Yang di-Pertua,

1. Jumlah keseluruhan pelaburan yang diluluskan bagi tempoh Mac hingga September 2020 adalah bernilai RM66.9 bilion yang melibatkan 1,054 projek dan dijangka akan menjana sejumlah 44,354 peluang pekerjaan. Jumlah pelaburan yang diluluskan ini merangkumi pelaburan yang diluluskan di dalam sektor perkilangan dan perkhidmatan di bawah bidang kuasa Lembaga Pembangunan Pelaburan Malaysia (MIDA).
2. Dalam tempoh yang sama, sektor perkilangan merupakan penyumbang terbesar kepada nilai pelaburan yang diluluskan dengan jumlah sebanyak RM63.1 bilion. Pelaburan ini melibatkan 592 projek dan dijangka akan menjana sejumlah 40,943 peluang pekerjaan. Daripada jumlah kelulusan pelaburan tersebut, sebanyak RM38.8 bilion (61%) adalah melibatkan pelaburan asing.
3. Bagi sektor perkhidmatan pula, sebanyak 462 projek diluluskan dengan nilai RM3.8 bilion dan dijangka akan mewujudkan sebanyak 3,411 peluang pekerjaan. Daripada jumlah tersebut, sebanyak RM0.7 bilion (19%) adalah melibatkan pelaburan asing.

Pelaburan Asing Mengikut Negeri Di Dalam Sektor Perkilangan

Tuan Yang di-Pertua,

4. Bagi tempoh Mac hingga September 2020, pelaburan asing bagi sektor perkilangan adalah sebanyak RM38.8 bilion (242 projek). Jumlah pelaburan langsung asing yang diterima mengikut negeri, berserta bilangan projek dan peluang pekerjaan yang bakal dijana adalah seperti berikut:

Negeri	Bilangan Projek	Peluang Pekerjaan	Pelaburan Asing (RM juta)
Sarawak	4	4,586	14,547.9
Pahang	11	503	7,996.9
Pulau Pinang	48	4,481	6,582.3

Negeri	Bilangan Projek	Peluang Pekerjaan	Pelaburan Asing (RM juta)
Johor	70	4,454	2,466.9
Terengganu	4	140	1,817.0
Selangor	54	2,617	1,764.0
Kuala Lumpur	2	540	1,047.5
Perak	16	1,341	1,014.2
Melaka	11	572	582.2
Kedah	16	1,066	527.3
Negeri Sembilan	6	443	451.5
Jumlah	242	20,743	38,797.7

Pelaburan Asing Mengikut Negeri Di Dalam Sektor Perkhidmatan

Tuan Yang di-Pertua,

5. Bagi tempoh Mac hingga September 2020, jumlah pelaburan asing yang diluluskan bagi sektor perkhidmatan adalah sebanyak RM0.7 bilion dengan melibatkan 162 projek dengan pecahan mengikut negeri seperti berikut:

Negeri	Bilangan Projek	Peluang Pekerjaan	Pelaburan Asing (RM juta)
Selangor	47	512	575.8
Kuala Lumpur	54	156	84.7
Johor	29	21	21.7
Pulau Pinang	12	25	16.2
Melaka	4	12	6.4
Negeri Sembilan	8	7	5.5
Perak	3	6	1.8
Kedah	2	3	0.4
Pahang	1	1	0.2
Lain-lain	2	2	2.0
JUMLAH	162	745	714.9

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI HAJI IDRIS BIN JUSOH
[BESUT]**

TARIKH : 3 NOVEMBER 2020 [SELASA]

SOALAN

Minta **MENTERI PERTANIAN DAN INDUSTRI MAKANAN** menyatakan apakah langkah-langkah baharu Kementerian melalui penyelidikan dan pembangunan (R&D) dalam menyediakan kaedah pertanian moden khasnya dalam meningkatkan produktiviti dan hasil tani.

JAWAPAN

Tuan Yang Dipertua,

1. Malaysia menduduki tangga ke-28 dengan skor 73.8% dalam *Global Food Security Index* (GFSI) 2019 yang diterbitkan oleh *The Economist* di mana kita telah meningkat daripada kedudukan 40 pada tahun 2018. Walau bagaimanapun, Malaysia mencatatkan skor yang rendah iaitu hanya 2.6% dalam perbelanjaan dana awam untuk tujuan penyelidikan dan pembangunan (R&D) pertanian, berbanding skor 100% yang dicapai oleh Singapura yang berada pada kedudukan pertama.

2. Dalam hal ini, antara aspek yang perlu ditekankan bagi memperbaiki kedudukan negara adalah perbelanjaan dan pelaburan awam dalam R&D pertanian termasuk infrastruktur, perkhidmatan pengembangan, bank gen tanaman & ternakan serta pembangunan

teknologi bagi memodenkan sektor pertanian dalam usaha meningkatkan kecekapan pengeluaran dan produktiviti hasil pertanian.

3. Pemodenan sektor pertanian boleh dicapai seiring dengan pengaplikasian prinsip-prinsip Revolusi Industri Ke-Empat (IR4.0) seperti *Internet of Things* (IoT), *Big Data*, *Blockchain*, *Artificial Intelligence* (AI) dan *Machine Learning*.

4. Justeru, di bawah Dasar Agromakanan Negara 2.0 (2021-2030) dan hala tuju RMK-12 (2021-2025), Kementerian melalui MARDI akan menfokuskan kepada R&D teknologi moden berteraskan IR4.0 dalam usaha meningkatkan produktiviti dan hasil tani yang merangkumi:

- (i) Sistem pintar seperti jentera tanpa pemandu, dron pintar, sistem robotik pintar, *smart housing and mobility facility*;
- (ii) Sistem kawalan dan pemantauan pintar bagi sumber dan tanaman melibatkan nutrien pokok, keadaan tanah, iklim dan air; dan
- (iii) Sistem perancang sumber pengeluaran pintar berasaskan *blockchain* bagi meningkatkan kecekapan rantaian pengeluaran dan bekalan di pasaran.

5. Selain itu, Kementerian juga akan memberi fokus kepada pembangunan teknologi bersepadu berteraskan R&D melibatkan mekanisasi dan automasi serta benih dan baka baharu bagi meningkatkan pengeluaran, meningkatkan daya tahan penyakit, menambahbaik pengendalian lepas tuai dan pemprosesan produk pertanian yang berkesan untuk mendapatkan hasil yang tinggi dengan kos yang efektif.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 3 NOVEMBER 2020 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI KESIHATAN** menyatakan sepanjang tempoh PKP, adakah kakitangan KKM (klinikal) diberikan cuti PKP (cuti tidak berekod) jika mereka ingin berehat satu atau dua hari dalam waktu PKP atau adakah cuti tersebut ditolak dari Cuti Rehat (CR).

JAWAPAN

Tuan Yang di-Pertua,

1. Semasa tempoh Perintah Kawalan Pergerakan (PKP), Jabatan Perkhidmatan Awam (JPA) telah menjelaskan bahawa **pegawai dibenarkan untuk tidak hadir ke pejabat, institusi atau fasiliti mengikut waktu bekerja yang ditetapkan dan diberi kebenaran untuk melaksanakan skop tugas di rumah atau Bekerja Dari Rumah (BDR).**

2. Bagi kakitangan Kementerian Kesihatan yang menjalankan tugas-tugas klinikal, **mereka boleh dipertimbangkan oleh Ketua Jabatan untuk diberikan cuti rehat atau melaksanakan penggiliran tugas serta BDR bagi tujuan berehat untuk memulihkan kecekapan.** Namun, pertimbangan cuti rehat atau penggiliran tugas ini dibuat setelah mengambil kira kepentingan perkhidmatan.

3. Selain itu, berdasarkan Perintah Am mengenai cuti, Cuti Gantian boleh diberikan kepada pegawai yang telah diarahkan untuk bekerja lebih masa tetapi tidak berkelayakan mendapat bayaran bekerja lebih masa atau sebarang bayaran khas lain. Kadar Cuti Gantian adalah sama banyak dengan tempoh bertugas lebih masa yang diarahkan dan perlu digunakan dalam tempoh enam (6) bulan dalam tahun yang sama.

4. Walau bagaimanapun, perkara ini akan dirujuk kepada JPA agar anggota kesihatan yang terlibat dalam membendung penularan wabak COVID-19 diberikan pengecualian supaya Cuti Gantian boleh digunakan secara melangkaui tahun.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN YAMANI HAFEZ B. MUSA (SIPITANG)

TARIKH : 3 NOVEMBER 2020 (SELASA)

SOALAN

TUAN YAMANI HAFEZ BIN MUSA [SIPITANG] minta **MENTERI DALAM NEGERI** menyatakan jumlah PATI yang dihantar pulang ke negara asal masing-masing sejak awal tahun ini, dan bagaimana Kerajaan menangani isu kebanjiran pendatang asing di negara ini, terutama di Sabah menjadi isu hangat sekarang.

JAWAPAN

Tuan Yang Di Pertua,

Untuk makluman Ahli Yang Berhormat, antara langkah yang diambil oleh Kerajaan bagi menangani peningkatan jumlah pendatang asing tanpa izin (PATI) di Sabah adalah dengan menggiatkan tindakan penguatkuasaan serta pengusiran ke atas PATI di Sabah melalui operasi yang dijalankan oleh Jabatan Imigresen Malaysia (JIM).

Sebanyak 720 operasi telah dilaksanakan di negeri Sabah oleh Jabatan Imigresen Malaysia dari 1 Januari sehingga 23 Oktober 2020 yang mana 16,720 orang warganegara asing diperiksa dan daripada jumlah tersebut, seramai 1,840 PATI serta 24 orang majikan telah ditangkap atas pelbagai kesalahan. Kesungguhan Kerajaan untuk mengatasi isu PATI ini dapat dilihat melalui jumlah penghantaran pulang yang dilaksanakan bermula dari 1 Januari hingga 23 Oktober 2020 yang berjumlah 6,782 orang melibatkan PATI dari negara Filipina, Indonesia dan lain-lain.

SOALAN NO : 15

Seperti mana Ahli Yang Berhormat sedia maklum juga, Jawatankuasa Pengurusan Warga Asing di Sabah (JKPWAS) telah ditubuhkan oleh Kerajaan susulan daripada syor Suruhanjaya Siasatan Diraja (*Royal Commission of Inquiry* - RCI) Mengenai Pendatang Asing di Sabah bertujuan untuk mengkaji dan membincangkan isu berkaitan pendatang dan orang asing di Sabah.

Komposisi JKPWAS yang merangkumi JKPWAS Induk yang dipengerusikan secara bersama oleh YB Menteri Dalam Negeri dengan YAB Ketua Menteri Sabah serta JKPWAS Teknikal yang dipengerusikan oleh YB Timbalan Menteri Dalam Negeri adalah merupakan platform terbaik bagi mencari penyelesaian berkenaan pengurusan pendatang dan orang asing di Sabah. Ini adalah kerana keahlian kedua-dua Jawatankuasa tersebut yang merangkumi penglibatan Jabatan/Agensi/Bahagian peringkat Persekutuan dan Negeri seperti Jabatan Ketua Menteri (JKM) Sabah, Jabatan Pendaftaran Negara (JPN), Jabatan Imigresen Malaysia (JIM), Polis Diraja Malaysia (PDRM), Majlis Keselamatan Negara (MKN) serta beberapa Jabatan/Agensi yang lain.

Jawatankuasa ini sentiasa mengambil langkah proaktif dalam mengatasi isu-isu berbangkit dalam melaksanakan pelan tindakan yang dirumuskan oleh Suruhanjaya termasuklah berhubung isu pendatang asing tanpa izin (PATI) di Sabah melalui mesyuarat yang dijadualkan secara berkala sepanjang tahun.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. HAJI DZULKEFLY BIN AHMAD
[KUALA SELANGOR]**

TARIKH : 3 NOVEMBER 2020 (SELASA)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI KESIHATAN** menyatakan kesediaan Kementerian menjalinkan kerjasama perkongsian data antara wilayah khususnya di Selangor dalam menangani gelombang ketiga semasa sepertimana yang pernah dilakukan sebelumnya dengan kerjasama erat dan perkongsian data antara KKM, MKN dan Pusat Operasi Kerajaan Negeri Selangor.

JAWAPAN

Tuan Yang di-Pertua,

1. Kementerian Kesihatan Malaysia (KKM) mengambil maklum mengenai inisiatif yang telah dilaksanakan oleh Kerajaan Negeri Selangor melalui penubuhan “Selangor Task Force COVID-19” (STFC), yang antara lain mempunyai objektif untuk membangunkan keupayaan kerajaan negeri dari segi penggunaan, “*Big Data Analytic*” serta “*Machine Learning*” (dengan izin) bagi memandu ke arah kegiatan pelaksanaan seperti saringan dalam komuniti dan pengesanan kontak agar ianya lebih terarah dan bersasar, terutamanya di dalam menangani kejadian pandemik COVID-19 di peringkat negeri Selangor.
2. KKM mengalu-alukan tindakan proaktif ini, selaras dengan komitmen Kementerian ini untuk memastikan tanggungjawab bagi mengawal kejadian pandemik COVID-19 dipikul secara bersama oleh pelbagai Kementerian mahupun agensi.
3. Tidak dinafikan, bagi memenuhi keperluan mendesak untuk menangani penularan COVID-19 secara berkesan, **KKM telah membuat penurunan kuasa untuk perkongsian data yang agak terperinci dengan pihak Polis Diraja Malaysia (PDRM) di bawah Akta Pencegahan dan Pengawalan Penyakit Berjangkit 1988 [Akta 342]** – khusus bagi aktiviti pemantauan ke atas individu yang dikenakan Perintah Pengawasan dan Pemerhatian, di bawah seksyen 15(1) Akta tersebut. Namun begitu, **kebenaran khas ini dan data yang dikongsikan melalui peruntukan tersebut hanya boleh diguna pakai sepanjang tarikh kuatkuasa penurunan kuasa terbabit sahaja**. Ia mengambil kira bahawa rekod perubatan secara fizikalnya adalah hak milik pihak KKM manakala maklumat kandungannya adalah hak milik pesakit. Justeru, semua pihak yang terlibat dengan pengendalian dan penggunaan rekod perubatan pesakit adalah bertanggungjawab ke atas kerahsiaan dokumen berkenaan dan perlu mematuhi undang-undang, pekeliling serta arahan yang berkaitan.

4. Seterusnya, data mentah (raw data) yang diperolehi dari aktiviti di lapangan, perlu melalui proses verifikasi bagi memastikan ketepatan serta kesahihan data yang dilaporkan. Setiap pesakit yang dilaporkan akan diberikan nombor kes bagi membolehkan analisa data dan kerahsiaannya terjaga. Kesemua proses ini perlu dilaksanakan secara teliti dan tepat dalam tempoh masa yang singkat bagi membolehkan maklumat yang betul disampaikan kepada masyarakat dan ia juga membantu KKM serta jentera Kerajaan secara keseluruhannya untuk membuat keputusan penting bagi mengekang penularan wabak COVID-19.

5. Disebabkan juga oleh beberapa insiden tidak diingini yang telah berlaku sebelum ini berhubung pengurusan data mentah (raw data), KKM tidak dapat memenuhi permintaan sesetengah pihak untuk mendapatkan akses kepada data mentah COVID-19. Ia bagi mengelakkan risiko tafsiran data yang bertentangan atau tidak seragam oleh pelbagai agensi yang terlibat, yang berkemungkinan menyebabkan masyarakat menjadi panik dan bercelaru akibat maklumat yang disampaikan.

6. Hakikatnya, penubuhan "Selangor Task Force COVID-19" (STFC) turut bertujuan untuk mendidik masyarakat supaya mempunyai kefahaman yang betul mengenai COVID-19. Melaluinya, adalah diharapkan masyarakat akan menjadi lebih bertanggungjawab, bagi memenuhi seruan untuk memainkan peranan masing-masing sebagai "petugas barisan hadapan" dan terus mengamalkan norma baharu dalam usaha membantu Kerajaan memerangi penularan COVID-19. KKM amat yakin melalui kerjasama strategik yang dijalinan secara saling melengkapi (*complementary*) di antara Kerajaan Pusat dan Kerajaan Negeri, ianya mampu untuk membawa Malaysia kepada suatu tahap yang membanggakan terutamanya dalam usaha untuk bersama-sama membendung wabak ini di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH
BIN MOHD FAKEH [SABAK BERNAM]**

TARIKH : 3 NOVEMBER 2020 (SELASA)

SOALAN

DATO' HAJI MOHD FASIAH BIN MOHD FAKEH [SABAK BERNAM] minta **MENTERI SUMBER MANUSIA** menyatakan jumlah pekerja yang telah diberhentikan semenjak Mac hingga Oktober 2020 dan nyatakan bidang atau jenis pekerjaan yang terlibat serta nyatakan setakat manakah keberkesanan Program Insentif Pengambilan Pekerja (*Hiring Incentive Programme*) dan langkah Kerajaan membantu nasib pekerja yang cuti tanpa gaji.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, berdasarkan rekod **Sistem Insurans Pekerjaan (SIP)**, seramai **77,988** orang pekerja telah diberhentikan dari Mac hingga **16 Oktober 2020**.

2. Rekod Sistem Insurans Pekerjaan (SIP) juga menunjukkan kes kehilangan pekerjaan adalah melibatkan bidang pekerjaan seperti berikut;

- i. Pertamanya melibatkan kategori pengurus iaitu seramai 11,584 orang pekerja diberhentikan;
- ii. Kedua adalah kategori profesional iaitu seramai 22,647 orang pekerja diberhentikan;
- iii. Ketiga adalah kategori juruteknik dan profesional iaitu seramai 17,019 orang pekerja diberhentikan;
- iv. Keempat adalah kategori pekerja sokongan dan perkeranian iaitu seramai 7,786 orang pekerja diberhentikan;
- v. Kelima adalah operator mesin, loji dan pemasangan iaitu seramai 10,423 orang pekerja diberhentikan; dan
- vi. Keenam adalah kategori pekerja perkhidmatan dan jualan iaitu seramai 10,423 orang pekerja diberhentikan.

3. Keberkesanan beberapa inisiatif di bawah **Program Insentif Pengambilan Pekerja (*Hiring Incentive Programme*)**, yang dilaksanakan oleh Kementerian sehingga 22 Oktober 2020 adalah seperti berikut;

- i. Program ***MyApprentice*** – Seramai **4,433** calon telah berjaya ditempatkan di bawah program ***MyApprentice***;

SOALAN NO : 17

- ii. Program **HireMalaysia** - Seramai **51,020** pekerja berjaya ditempatkan bagi umur bawah 40 tahun ke bawah dan **7,705** orang pekerja bagi 40 tahun ke atas;
- iii. Insentif Pengambilan Pekerja Tempatan dari golongan **Orang Kurang Upaya (OKU)**. Seramai **322** Orang Kurang Upaya (OKU) berjaya ditempatkan;
- iv. **Bantuan Mobiliti** - Seramai **3,477** orang pekerja telah mendapat faedah melalui Bantuan Mobiliti ini;
- v. Program **latihan** - Seramai **7,759** orang pekerja telah mendapat manfaat dari program latihan; dan
- vi. Portal **MYFutureJobs** - Sejak **MyFutureJobs** diperkenalkan, sebanyak **301,244** kekosongan jawatan dan **294,256** pencari kerja telah didaftarkan.

Tuan Yang di-Pertua,

4. Bagi membantu majikan agar dapat mengekalkan pekerja-pekerja mereka terutamanya pekerja yang telah diberi notis cuti tanpa gaji (CTG), Kerajaan telah mengambil **langkah** memperkenalkan **Employment Retention Programme (ERP)**. Sehingga 16 Oktober 2020, program ini telah berjaya membantu seramai 340,252 pekerja melibatkan RM211.33 juta.

5. Program Subsidi Upah pula adalah bertujuan untuk membantu majikan yang terkesan supaya dapat meneruskan operasi syarikat. Sehingga 16 Oktober 2020, sebanyak 331,950 majikan melibatkan 2.7 juta pekerja telah menerima manfaat melibatkan bayaran sebanyak RM11.9 bilion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ
BIN TUN DR. MAHATHIR [JERLUN]**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan mengapa harga benih padi naik melampaui harga pasaran, kualiti varieti benih tidak sebaik dulu dan berlaku kelewatan pembekalan yang menjejaskan jadual pengairan yang ditetapkan oleh MADA, sekaligus mengurangkan keberhasilan industri padi tempatan.

JAWAPAN

Tuan Yang Dipertua,

1. Untuk makluman Ahli Yang Berhormat, Insentif Benih Padi Sah (IBPS) merupakan salah satu daripada program subsidi dan insentif yang diuruskan oleh Kementerian bagi membantu golongan sasaran dalam sektor padi dan beras iaitu pesawah padi. Ianya bermatlamat untuk membantu pesawah mengurangkan kos pengeluaran padi serta menggalakkan mereka menggunakan benih padi sah yang berkualiti, bermutu tinggi, rintang penyakit dan mengurangkan risiko padi angin.
2. Pada masa ini, mekanisma pengeluaran dan pembekalan benih padi sah dilaksanakan oleh kesemua syarikat pengeluar benih padi sah yang dilantik oleh Kerajaan sahaja. Walau bagaimanapun, Kerajaan menetapkan harga jualan di premis pengeluaran benih padi sah di pintu kilang berjumlah RM28.00 per beg (20 kilogram setiap beg) kepada sesiapa sahaja tanpa kawalan sama ada Pertubuhan Peladang Kawasan (PPK), ejen, syarikat, pelesen atau broker. Keadaan ini mengakibatkan manipulasi terhadap harga benih padi sah dibeli oleh pesawah yang melonjak kepada sekitar RM46 sehingga RM100 untuk setiap beg.
3. Sehubungan itu, Kementerian telah meneliti isu pengedaran benih padi sah ini dan setelah bertemu dengan pemegang taruh telah merangka hala tuju dan penambahbaikan program IBPS dari semasa ke semasa. Oleh yang demikian, Kementerian akan melaksanakan beberapa inisiatif bermula pada tahun 2021 seperti berikut:
 - i. Pertama, melantik Pertubuhan Peladang Kebangsaan (NAFAS) sebagai pemborong tunggal dalam program IBPS dan pembekalan diedarkan terus kepada pesawah. Pelantikan NAFAS sebagai pemborong tunggal untuk mengedarkan benih padi sah merupakan suatu kaedah penyelesaian terbaik dan bersepadu memandangkan NAFAS mempunyai kecekapan rangkaian di mana pengedaran benih padi sah oleh NAFAS melibatkan 148 PPK dalam kawasan padi di Semenanjung Malaysia. Pada masa yang sama, NAFAS juga akan memberi ruang kepada agen, individu atau syarikat sedia

ada yang berdaftar lesen dengan pihak Kementerian untuk mengedarkan benih padi sah. NAFAS juga mempunyai sumber kewangan yang kukuh serta kemampuan dan pengalaman NAFAS dalam pengedaran Skim Baja Padi Kerajaan Persekutuan (SBPKP) di seluruh negara.

- ii. Kedua, pelantikan NAFAS juga akan membolehkan penetapan harga siling benih padi sah dilaksanakan tanpa melibatkan tambahan peruntukan insentif kepada Kerajaan. Ianya juga akan mengelakkan manipulasi benih padi sah dan harga di lapangan menerusi pembelian tanpa kawalan oleh pelbagai pihak di pintu kilang.
- iii. Ketiga, lesen dan permit akan diberikan kepada agen, individu atau syarikat yang berdaftar dengan Kerajaan untuk mengedarkan benih padi sah;
- iv. Keempat, penetapan beberapa varieti benih padi sah yang akan dihasilkan oleh syarikat pengeluar benih padi sah untuk dipilih oleh pesawah; dan
- v. Kelima, menyediakan stok penimbun benih padi sah bagi menangani isu-isu krisis seumpama ini.

4. Justeru itu, sememangnya mekanisme penstrukturan semula keseluruhan rantai nilai yang dilakukan oleh Kerajaan ini adalah untuk menjamin mutu perkhidmatan di samping memberikan hak kepada pesawah untuk memilih benih padi yang terbaik bagi kegunaan sawah padi mereka. Pada masa yang sama, langkah-langkah penyelesaian ini dapat mengelakkan manipulasi benih padi sah dan harga di lapangan menerusi pembelian tanpa kawalan oleh pelbagai pihak di pintu kilang. Ianya penting bagi mengelak dominasi syarikat pembekal tertentu terhadap pasaran benih padi sah secara khususnya, dan sektor padi dan beras secara umumnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI TIONG KING SING [BINTULU]

TARIKH : 3 NOVEMBER 2020 (SELASA)

SOALAN

DATO' SERI TIONG KING SING [BINTULU] minta **MENTERI KESIHATAN** menyatakan apakah pelan jangka masa panjang dan pemulihan serta kesediaan Kementerian dari segi perubatan dalam berdepan dengan pandemik COVID-19 di negara ini terutamanya pandemik COVID-19 dijangka akan berlarutan.

JAWAPAN

Tuan Yang di-Pertua,

1. Kementerian Kesihatan Malaysia (KKM) menyedari hakikat kejadian pandemik COVID-19 ini dijangka akan berterusan untuk suatu tempoh masa yang agak lama dan masih tiada vaksin serta ubat bagi COVID-19.

2. Sebagai pelan jangka masa panjang dan pemulihan, KKM sedang melaksanakan Kempen Pembudayaan Norma Baharu menggunakan pendekatan “Cegah dan Didik, Amal, Patuh dan Pantau.” Bagi memastikan pelaksanaannya, pelbagai pihak dilibatkan iaitu Klinik Kesihatan, Pejabat Kesihatan Daerah, Majlis Tindakan Daerah, NGO dan pemimpin-pemimpin komuniti dengan menggunakan strategi berikut:

- i. Pendidikan kesihatan kepada pelanggan/ komuniti di daerah;
- ii. Kenalpasti kumpulan berisiko tinggi;

SOALAN NO : 19

- iii. Penglibatan Community Based Organisation (CBO) dalam promosi kesihatan seperti Panel Penasihat Klinik Kesihatan;
- iv. Survelan Influenza Like illness & COVID-19;
- v. Usaha advokasi;
- vi. Kenalpasti kumpulan berisiko tinggi mendapat dan menyebarkan jangkitan COVID-19;
- vii. Penguatkuasaan; dan
- viii. Memperkukuhkan pelaksanaan aktiviti pencegahan dan pengawalan.

3. KKM juga meningkatkan keberkesanan sistem pelaporan di mana setiap kejadian COVID-19 dilaporkan ke Pejabat Kesihatan Daerah yang berhampiran, *Crisis, Preparedness, and Response Centre* (CPRC) di peringkat Jabatan Kesihatan Negeri (JKN) dan juga CPRC Kebangsaan secara serentak. Proses pelaporan ini adalah penting kerana koordinasi dan kawalan kejadian COVID-19 dijalankan secara sistematik dan efektif di setiap peringkat.

4. KKM juga memperkenalkan Agenda Nasional Malaysia Sihat (ANMS) bagi menjadikan rakyat Malaysia daripada semua peringkat agar sihat dari segi fizikal, mental dan sosial serta mengamalkan norma baharu kesihatan. ANMS ini menjadikan *health in all policies* sebagai keutamaan dengan menggunakan pendekatan *whole of government* dan *whole of society* melalui penglibatan semua Kementerian, agensi Kerajaan, swasta, badan bukan Kerajaan (NGO) dan komuniti bagi memastikan pelaksanaan yang menyeluruh.

Tuan Yang di-Pertua,

5. Dari segi perubatan, semenjak awal penularan COVID-19 lagi, KKM telah mengambil pelbagai tindakan untuk memastikan kelengkapan logistik, tenaga kerja, set kelengkapan pelindung diri, alat bantuan pernafasan dan katil untuk pesakit di hospital adalah mencukupi.

6. **Bilangan hospital Kerajaan yang memberi rawatan COVID-19 telah ditingkatkan dari 26 kepada 44 buah hospital menjadikan jumlah katil khas untuk pesakit COVID-19 di hospital sebanyak 3,678 buah.** Di samping itu, Pusat-pusat Kuarantin dan Rawatan Berisiko Rendah (PKRC) juga telah dikenal pasti di setiap negeri bagi menambahkan bilangan katil. **Pusat-pusat ini telah diaktifkan di semua negeri dengan jumlah katil sebanyak 8,458 buah, menjadikan jumlah keseluruhan sebanyak 12,136 buah katil.**

7. KKM juga telah berusaha untuk mempertingkatkan keupayaan makmal COVID-19 di tahap optimum bagi menampung keperluan ujian COVID-19 di seluruh negara dan **telah berjaya meningkatkan kemampuan ujian makmal RT PCR COVID-19 daripada 1,000 ujian sehari pada Januari 2020 kepada 58,466 ujian sehari (20 Oktober 2020).** Secara keseluruhannya, terdapat **61 buah makmal di seluruh negara yang boleh menjalankan ujian pengesanan COVID-19 secara Reverse Transcription Polymerase Chain Reaction (RT-PCR).**

8. Kerajaan juga telah meluluskan cadangan Projek MKA Sarawak. MKA Sarawak akan menjadi sebahagian daripada rangkaian MKA yang telah dikenal pasti mengikut zon di seluruh negara bagi menyediakan perkhidmatan makmal khusus untuk pengawalan dan pemantauan penyakit, penyiasatan wabak, keselamatan air dan makanan, persekitaran serta krisis kesihatan awam.

9. Dengan usaha-usaha yang diambil oleh Kerajaan, KKM berharap setiap peringkat dan lapisan masyarakat juga memainkan peranan masing-masing dalam mengekang penularan jangkitan COVID-19 dengan mengamalkan kelaziman baharu dalam kehidupan seharian serta pematuhan kepada Prosedur Operasi Standard (SOP) seperti yang telah ditetapkan oleh Majlis Keselamatan Negara (MKN).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 03 NOVEMBER 2020 (SELASA)

SOALAN

Minta **MENTERI PENGANGKUTAN** menyatakan senarai siri nombor pendaftaran yang telah dibida melalui sistem 'JPJ e-Bid' dan jumlah pendapatan yang dijana daripada setiap siri tersebut.

JAWAPAN

Yang di-Pertua,

1. Untuk makluman Yang Berhormat, Sistem Bidaan Nombor Pendaftaran Kenderaan Dalam Talian (JPJeBid) adalah sistem yang dibangunkan oleh Kementerian Pengangkutan Malaysia (MOT) melalui Jabatan Pengangkutan Jalan Malaysia (JPJ).
2. JPJeBid telah mula dilaksanakan sejak 15 April 2019 dan sehingga 21 Oktober 2020, sebanyak Seratus Empat Puluh Tiga (143) siri telah selesai bidaan.
3. Pada tahun 2019, iaitu sejak bulan April, sebanyak Lima Puluh Empat (54) siri telah selesai bidaan dengan kutipan hasil sebanyak Ringgit Malaysia Enam Puluh Satu Juta Sembilan Ratus Enam Puluh Dua Ribu Tujuh Ratus Dua Puluh Empat (RM 61,962,724.00).
4. Manakala pada tahun ini, sehingga bulan Oktober 2020, sebanyak Lapan Puluh Sembilan (89) siri telah selesai bidaan dengan kutipan hasil berjumlah Ringgit Malaysia Satu Ratus Lapan Belas Juta Sembilan Ratus Dua Puluh Sembilan Ribu Tujuh Ratus Enam Puluh Tiga.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 3 NOVEMBER 2020 (SELASA)

SOALAN

Minta **MENTERI PENGANGKUTAN** menyatakan apakah tindakan Kerajaan bagi memastikan penjarakan fizikal dalam pesawat diamalkan oleh syarikat penerbangan oleh kerana terdapat beberapa kes-kes jangkitan COVID-19 dilaporkan adalah diperoleh dari dalam pesawat penerbangan.

JAWAPAN

Yang di-Pertua,

1. Untuk makluman Yang Berhormat, Kementerian Pengangkutan dan Kementerian Kesihatan amat prihatin terhadap perihal keselamatan dan kesihatan penumpang-penumpang yang menggunakan perkhidmatan pengangkutan udara. Dalam hubungan ini, pihak International Civil Aviation Organization (ICAO), World Health Organization (WHO) dan International Air Transport Association (IATA) telah mengeluarkan garis panduan berhubung tindakan-tindakan yang perlu diambil bagi menyekat penularan wabak COVID-19 dalam pesawat penerbangan.
2. Selanjutnya, pihak ICAO, WHO dan IATA tidak menyarankan untuk Kerajaan mewajibkan penetapan penjarakan sosial dalam pesawat dilaksanakan. Sebaliknya, semua syarikat penerbangan disarankan untuk memastikan semua penumpang memakai pelitup muka dan membawa *hand sanitizer*. Pada masa yang sama, adalah penting saringan kesihatan dilaksanakan kepada semua penumpang menaiki dan keluar pesawat bagi mengenal pasti penumpang yang bergejala.
3. IATA melalui garis panduan *Guidance for Cabin Operations During and Post Pandemic Edition* yang dikeluarkan pada 22 April 2020 telah menjelaskan bahawa risiko penyebaran wabak COVID-19 dalam pesawat adalah rendah sekiranya penumpang memakai penutup muka dan mengurangkan sentuhan. IATA menjelaskan bahawa kedudukan tempat duduk penumpang yang tegak dengan muka memandang hadapan dapat menghadkan interaksi antara penumpang secara bersemuka, manakala aliran udara dalam pesawat iaitu dari siling ke lantai pesawat dengan penggunaan penapis udara *high efficiency particulate air* (HEPA) merupakan antara faktor yang membantu mengurangkan risiko penularan wabak COVID-19 semasa penumpang berada dalam pesawat.
4. Sehubungan dengan saranan ini, Mesyuarat Khas Menteri-Menteri Mengenai Pelaksanaan Perintah Kawalan Pergerakan Bil. 50/2020 yang telah diadakan pada 6 Jun 2020 antara lain telah memaklumkan bahawa Kerajaan telah bersetuju supaya penjarakan sosial dalam pesawat

dikecualikan sepenuhnya bagi semua perkhidmatan penerbangan berjadual dan tidak berjadual termasuk general aviation, operasi private jet dan helikopter berkuatkuasa mulai 10 Jun 2020.

5. Walaupun penjarakan sosial dalam pesawat penerbangan telah diberikan pengecualian oleh pihak kerajaan, namun operator lapangan terbang dan syarikat-syarikat penerbangan masih diwajibkan untuk melaksanakan *Standard Operating Procedures* (SOP) yang telah ditetapkan semasa di terminal lapangan terbang, semasa menaiki pesawat dan semasa berada dalam pesawat bagi mengelak berlakunya penularan wabak COVID-19 dengan mengambil langkah-langkah seperti berikut:

- a. saringan suhu badan diwajibkan kepada pekerja, pengguna, krew penerbangan dan penumpang;
- b. pemakaian pelitup muka (*face mask*) diwajibkan di kawasan umum lapangan terbang serta kepada semua krew dan penumpang yang memasuki pesawat penerbangan;
- c. hidangan makanan dalam pesawat (*in-flight meal*) adalah tidak digalakkan dan interaksi dengan penumpang diminimalkan;
- d. proses nyahkuman ruang pesawat selepas setiap operasi penerbangan; dan
- e. amalan penjarakan sosial di kawasan umum lapangan terbang melalui tanda jarak 1 meter di lantai, meja dan kerusi kecuali di pintu pelepasan (*boarding gate*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE EMPAT BELAS**

PERTANYAAN : LISAN

**DARIPADA : DATUK MOHAMADDIN BIN KETAPI
[LAHAD DATU]**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan usaha kementerian dalam melahirkan lebih ramai usahawan ternakan lembu dan ayam di Sabah dan bantuan yang diberikan.

JAWAPAN

Tuan Yang di-Pertua,

1. Sepanjang tempoh pelaksanaan Rancangan Malaysia ke 11 (RMK11), ramai usahawan ternakan terutamanya usahawan ternakan ruminan dan unggas, telah dibangunkan melalui pelbagai inisiatif dan program yang telah dirancang dan dilaksanakan oleh Kementerian Pertanian dan Industri Makanan (MAFI).

2. Antara inisiatif pembangunan usahawan ternakan yang dilaksanakan di negeri Sabah oleh MAFI melalui Jabatan dan Agensi yang berkaitan, adalah seperti berikut:

- i. Pelaksanaan Projek Transformasi Tenusu melalui Jabatan Perkhidmatan Veterinar (DVS) Sabah yang telah melahirkan sebanyak 45 orang usahawan tenusu dalam tempoh lima (5) tahun di bawah RMK11 dengan jumlah keseluruhan peruntukan berjumlah RM44.67 juta. Usahawan tenusu yang terpilih telah menerima

manfaat dari aspek perolehan lembu tenusu, peralatan, dan jentera. Setakat ini, program ini telah berjaya menghasilkan 10 juta liter susu segar setahun dan projek ini akan diteruskan lagi di bawah perancangan RMK12;

- ii. Pelaksanaan Program Agropreneur Muda melalui Unit Agropreneur Muda MAFI yang telah melahirkan seramai 46 orang usahawan muda dalam tempoh lima (5) tahun sepanjang pelaksanaan RMK11. Kesemua 46 orang usahawan muda tersebut telah menerima pelbagai jenis bantuan geran berupa pembinaan kandang, pembelian baka, peralatan dan makanan haiwan yang merangkumi jumlah keseluruhan peruntukan sebanyak RM1.019 juta bagi kesemua penerima; dan
- iii. Pelaksanaan Skim Rezeki Ternak melalui DVS Sabah pada tahun 2020 yang akan membangunkan seramai 108 orang penternak ruminan dan 25 orang penternak unggas yang turut merangkumi penternak ayam. Penyaluran peruntukan berjumlah RM1.732 juta secara *one-off* ini adalah merangkumi bantuan input ternakan ruminan dan unggas, bekalan makanan ternakan, bekalan peralatan dan baikpulih kandang atau reban sedia ada.

3. MAFI melalui DVS sentiasa berusaha untuk membangun dan melahirkan usahawan dalam sektor penternakan dengan memberikan khidmat nasihat teknikal bagi memastikan produk yang dihasilkan adalah bersih dan selamat melalui penguatkuasaan peraturan-peraturan yang menjurus kepada pensijilan *Malaysia Good Agricultural Practice* (MyGAP). MAFI juga komited untuk memastikan pertanian terutamanya sektor penternakan diberikan fokus dan diperkukuhkan dengan pelaksanaan pendekatan holistik yang dapat membantu meningkatkan pendapatan penternak seterusnya menjamin sekuriti makanan negara. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN JUGAH ANAK MUYANG @ TAMBAT
[LUBOK ANTU]**

TARIKH : 03 NOVEMBER 2020 (SELASA)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI DALAM NEGERI** menyatakan supaya menempatkan Pegawai Nakortik di Pekan Lubok Antu, Sarawak memandangkan ramai di antara belia yang terlibat dalam gejala tidak sihat yang berlaku sekarang ini.

JAWAPAN

Tuan Yang Di-Pertua,

Kementerian Dalam Negeri (KDN) sentiasa berusaha menambah baik penyampaian perkhidmatan melalui agensi dibawahnya dalam usaha mengekang aktiviti pengedaran dadah di seluruh negara termasuk di Sarawak. PDRM juga sedang berusaha menambah baik perjawatan serta keanggotaan di seluruh negara bagi mempertingkatkan lagi '*service delivery*' dalam usaha membanteras pengedaran dan penyalahgunaan dadah yang semakin mencabar.

Untuk makluman Tuan Yang Di-Pertua, seorang Penolong Pegawai Penyiasat Narkotik telahpun ditempatkan di IPD Lubok Antu untuk membantu penugasan berkaitan dengan isu Narkotik. Dalam masa yang sama, Pegawai dan anggota lain di IPD Lubok Antu dan Balai Polis Lubok Antu juga sentiasa bersedia untuk membanteras masalah pengedaran dan penyalahgunaan dadah di Pekan Lubok Antu.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 3 NOVEMBER 2020 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan status pembinaan Hospital Petra Jaya Sarawak dan Klinik Kesihatan Tabuan Jaya. Jangka masa siap, pelan terkini serta syarikat-syarikat yang terlibat. Apakah sebab projek tersebut ditangguhkan dan tender dibuat sekali lagi.

JAWAPAN

Tuan Yang di-Pertua,

1. Projek Hospital Petrajaya (300 katil) telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah Rancangan Malaysia Kesepuluh (RMKe-10). Projek ini dilaksanakan oleh Jabatan Kerja Raya Malaysia (JKR Malaysia) dengan Fasa Pembinaan bermula pada 30 Mei 2013 dan dijadualkan siap pada 30 Jun 2018. **Walau bagaimanapun berikutan prestasi kemajuan projek yang tidak memuaskan, JKR Malaysia telah mengeluarkan Notis Penamatan Pengambilan Kerja Kontraktor kepada Zecon Berhad pada 2 Ogos 2018.**

2. Projek Menyiapkan Baki Kerja Terbengkalai Hospital Petrajaya dilaksanakan secara Tender Terbuka oleh JKR Malaysia. Taklimat Tender dan Lawatan Tapak telah berlangsung pada 12 Februari 2019 dengan tender ditutup pada 24 April 2019. Walau bagaimanapun, disebabkan tiada petender yang layak, maka Kementerian Kewangan

Malaysia (MOF) melalui surat pada 26 Ogos 2019 memutuskan supaya **projek ini ditender semula secara Tender Terbuka (Pra Kelayakan) di kalangan syarikat yang berdaftar dengan CIDB dan mempunyai Kod Bidang B29 (Kerja Bangunan Kesihatan) serta mempunyai Sijil Kontraktor Penyiap** bagi pelaksanaan projek terbengkalai sebelum ini.

3. Kini, projek ini **sedang berada di fasa perolehan kepada para petender yang telah lulus di peringkat pra kelayakan dan tarikh tutup tender ialah pada 7 Ogos 2020**. Projek kini berada dalam peringkat penilaian tender dan Surat Setuju Terima (SST) dijadualkan pada Januari 2021.

4. Bagi projek Klinik Kesihatan (Jenis 2) Tabuan Jaya, Kuching, ianya **telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah Rancangan Malaysia Ke-Sebelas (RMKe-11) dengan Anggaran Kos Projek adalah sebanyak RM40 juta**. Projek ini dilaksanakan secara Tender Terbuka oleh Jabatan Kerja Raya Sarawak (JKRS). Proses perolehan projek ini juga telah dilaksanakan di mana Tarikh Tutup Tender adalah pada 25 Februari 2019.

5. Walau bagaimanapun, **Lembaga Tender Pusat Persekutuan Sarawak (FCTB) pada 15 Januari 2020 menetapkan agar projek ditender semula kerana kelewatan surat persetujuan pelanjutan tempoh sah laku tender daripada petender yang berjaya**. Jangkaan tender terkini adalah pada November 2020. Tarikh jangka Surat Setuju Terima (SST) projek ini adalah pada Mei 2021 dan dijangka mengambil masa 30 bulan untuk dibina.

6. Kementerian Kesihatan Malaysia Kementerian ini bersama Jabatan Kerja Raya dan Agensi-agensi Kerajaan yang lain sentiasa bekerjasama dengan erat bagi memastikan projek ini berjalan dengan lancar dan sentiasa berusaha menambahbaik capaian sistem perkhidmatan kesihatan demi kesejahteraan rakyat Malaysia terutamanya penduduk Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
(BATU GAJAH)**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan sama ada Kementerian akan menamatkan monopoli import beras yang dipegang oleh BERNAS sehingga tahun 2021. Apakah rancangan Kementerian dalam memastikan jaminan keselamatan bekalan makanan negara terus dipelihara dalam jangka pendek dan jangka panjang.

JAWAPAN

Tuan Yang Dipertua,

1. Untuk makluman Ahli Yang Berhormat, Kerajaan telah bersetuju supaya konsesi Penswastan Padiberas Nasional Berhad (BERNAS) dilanjutkan selama 10 tahun lagi. Secara keseluruhannya, konsesi baharu telah ditambahbaik dan beberapa terma baharu dibuat termasuk penambahan bilangan Obligasi Sosial daripada 5 kepada 10 yang merangkumi tambahan jumlah simpanan stokpail beras negara bagi tujuan sekuriti makanan negara. Jawatankuasa Pemantauan sebagai badan penilai (*oversight body*) akan terus memantau pelaksanaan Obligasi Sosial BERNAS berdasarkan *Key Performance Indicator* (KPI) yang telah ditetapkan bagi setiap Obligasi Sosial yang telah dipersetujui.
2. Pelanjutan ini adalah penting dalam melindungi komoditi strategik khususnya beras sebagai makanan ruji rakyat Malaysia. Selain itu, keadaan ekonomi dunia pada masa kini yang tidak menentu kesan penularan pandemik COVID-19, juga menjadi asas kepada jaminan bekalan makanan negara perlu terus diberi keutamaan. Ia juga selaras dengan usaha Kerajaan untuk memartabatkan industri padi dan beras negara di samping mengurangkan implikasi kewangan yang besar kepada Kerajaan dalam mengurus industri. Setakat ini, Kerajaan melalui BERNAS telah memastikan bekalan beras dalam negara mencukupi pada setiap masa.
3. Pada masa yang sama, Kementerian juga sedang mengkaji secara menyeluruh pendekatan dan perancangan alternatif lain yang berkesan dalam jangka panjang ke arah pasaran industri beras yang lebih terbuka tanpa menjejaskan jaminan sekuriti makanan negara dan industri padi dan beras tempatan.
4. Berhubung dengan perancangan Kementerian dalam memastikan jaminan sekuriti bekalan makanan negara terus dipelihara dalam jangka pendek dan panjang, perkara berikut telah dilaksanakan :
 - i. Pengurusan Nutrien Lokasi Spesifik (SSNM) ataupun *soil profiling*. Program ini adalah untuk penggunaan baja dan kapur berdasarkan keperluan tanah yang berbeza mengikut kawasan;

SOALAN NO : 25

- ii. Pendekatan Sawah Berskala Besar (SBB) iaitu dengan penglibatan entiti swasta dalam rantai penanaman padi dan pengeluaran beras;
- iii. Penggunaan sumber air secara konjuktif (*conjunctive*) iaitu secara bersepadu untuk penanaman padi;
- iv. Perluasan kawasan jelapang padi dan pengoptimaan kawasan jelapang sedia ada dengan menambahkan kawasan-kawasan terbiar;
- v. Penerokaan kawasan baru ke dalam Kawasan Pembangunan Pertanian Bersepadu (IADA);
- vi. Penggunaan benih padi sah yang berkualiti bagi mengelakkan berlakunya kejadian benih padi angin;
- vii. Penggunaan teknologi moden dalam keseluruhan rantai industri padi dan beras; dan
- viii. Penglibatan golongan muda di dalam rantai penanaman padi dan beras.

5. Kementerian juga terus komited untuk meningkatkan pengeluaran beras negara sehingga tahap sara diri (SSL) mencecah 75% seperti yang digariskan dalam cadangan Kertas Strategi Rancangan Malaysia Kedua Belas (RMKe-12) bagi industri padi sekaligus dapat mengurangkan kebergantungan kepada import.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE EMPAT BELAS**

PERTANYAAN : LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan apakah langkah keselamatan seperti penyediaan Standard Operation Procedures (SOP) dan lain-lain kawalan yang dibangunkan oleh pihak Kerajaan seperti mewujudkan persatuan pembekal perkhidmatan dron, sukatan penggunaan kadar racun, impak alam sekitar dan sebagainya dalam penanaman padi dan lain-lain tanaman.

JAWAPAN

Tuan Yang Dipertua,

1. Pelbagai usaha sedang dan akan dilaksanakan oleh Kementerian dalam mendorong peningkatan penggunaan teknologi oleh petani dan usahawan tani. Teknologi dron atau pesawat tanpa pemandu (*Unmanned Aerial Vehicle*) adalah diantara teknologi yang mendapat sambutan dan digunakan secara meluas pada masa kini dalam sektor pertanian.

2. Penggunaan dron bagi sebarang tujuan dan aktiviti adalah tertakluk pada peraturan dan undang-undang berkaitan iaitu Akta Penerbangan Awam 1969 dan undang-undang kecil di bawahnya termasuk Peraturan-Peraturan Penerbangan Awam 2016. Peraturan ini menetapkan setiap pengendali dron yang hendak melaksanakan

sebarang aktiviti menggunakan dron perlu mendapatkan kelulusan daripada Pihak Berkuasa Penerbangan Awam Malaysia (CAAM).

3. Bagi penggunaan dron untuk aktiviti penyemburan racun makhluk perosak, selain daripada pengendali perlu mendapatkan kelulusan CAAM, pengendali juga perlu mendapat kebenaran di bawah Akta Racun Makhluk Perosak 1974 dan dilesenkan sebagai Pengendali Racun Makhluk Perosak Berlesen (*Pesticide Applicator License – PAL*) di bawah Kaedah-Kaedah Racun Makhluk Perosak (Pengendali Kawalan Makhluk Perosak) 2004.

4. Akta Racun Makhluk Perosak 1974 juga menetapkan racun makhluk perosak yang digunakan adalah diluluskan oleh Lembaga Racun Makhluk Perosak (LRMP) dan mempunyai syor untuk digunakan bersama dron dengan dinyatakan pada label kadar sukatan yang telah ditetapkan.

5. Bagi memastikan keberkesanan dan keselamatan penggunaan dron untuk tujuan penyemburan racun makhluk perosak, MAFI melalui Jabatan Pertanian Malaysia telah membangunkan Prosedur Operasi Standard (SOP) Semburan Racun Perosak Menggunakan UAV/ Dron. SOP yang dibangunkan adalah mematuhi syarat-syarat yang telah ditetapkan CAAM serta memperincikan syarat dan panduan yang perlu dipatuhi oleh pengendali dron bertujuan untuk memastikan kerja-kerja semburan racun perosak menggunakan dron adalah berkesan dan selamat kepada manusia, harta benda, haiwan ternakan serta alam sekitar. Selain itu, CAAM telah menetapkan kesemua pembekal dron haruslah menepati spesifikasi dron yang mematuhi syarat CAAM, Suruhanjaya Komunikasi dan Multimedia Malaysia (SKMM) dan SIRIM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AWANG HUSAINI BIN SAHARI
(PUTATAN)**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan perancangan Kementerian berkenaan dengan program khas untuk memulihkan sebanyak 4,000 hektar tanah sawah terbiar di negeri Sabah serta mengurangkan kadar kebergantungan terhadap beras-beras import.

JAWAPAN

Tuan Yang Dipertua,

1. Untuk makluman Ahli Yang Berhormat, program untuk membangunkan tanah terbiar di Negeri Sabah adalah di bawah seliaan kuasa Kerajaan Negeri.
2. Kementerian telah memperuntukkan sebanyak RM10.7 juta kepada Jabatan Pertanian Sabah melalui Projek Pembangunan Tanah Terbiar untuk membangunkan seluas 1,484 hektar tanah terbiar melibatkan seramai 1,283 orang petani. Tanah-tanah tersebut telah dibangunkan dengan pelbagai jenis tanaman seperti buah-buahan, sayur-sayuran, padi dan kelapa dengan jumlah pengeluaran keseluruhan yang dicatatkan berjumlah 225,578 metrik tan dan nilai pengeluaran sebanyak RM214.5 juta.
3. Projek ini juga menawarkan insentif kepada usahawan dan pemilik tanah pada kadar maksimum RM20,000/hektar secara *one-off* seperti berikut:

- i) pembangunan infrastruktur asas seperti pembersihan kawasan, sistem pengairan dan saliran serta pembinaan jalan ladang; dan
- ii) input pertanian berupa benih, baja, racun, mesin dan peralatan kecil.

4. Kementerian juga telah melaksanakan beberapa pendekatan bagi merencanakan penanaman padi bagi mengurangkan kadar kebergantungan terhadap beras-beras import seperti berikut:

- i) Pengurusan Nutrien Lokasi Spesifik (SSNM) ataupun lebih dikenali sebagai *soil profiling*. Program ini adalah untuk penggunaan baja dan kapur berdasarkan keperluan tanah yang berbeza mengikut kawasan;
- ii) Pendekatan Sawah Berskala Besar (SBB) iaitu dengan penglibatan entiti swasta dalam rangkaian penanaman padi dan pengeluaran beras;
- iii) Penggunaan sumber air secara konjuktif (*conjunctive*) iaitu secara bersepadu untuk penanaman padi;
- iv) Perluasan kawasan jelapang padi dan pengoptimaan kawasan jelapang sedia ada dengan menambahkan kawasan-kawasan terbiar;
- v) Penerokaan kawasan baru ke dalam Kawasan Pembangunan Pertanian Bersepadu (IADA);
- vi) Penggunaan benih padi sah yang berkualiti bagi mengelakkan berlakunya kejadian benih padi angin;
- vii) Penggunaan teknologi moden dalam keseluruhan rangkaian industri padi dan beras; dan
- viii) Penglibatan golongan muda di dalam rangkaian penanaman padi dan beras.

5. Kementerian terus komited untuk meningkatkan pengeluaran beras negara sehingga tahap sara diri mencecah 75% seperti yang digariskan dalam Kertas Strategi RMKe-12 bagi industri padi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan perancangan jangka masa panjang Kementerian dalam membantu golongan nelayan di Malaysia agar sektor perikanan negara mampu untuk mencatatkan sumbangan yang lebih besar kepada Keluaran Dalam Negara Kasar (KDNK) Malaysia.

JAWAPAN

Tuan Yang di-Pertua,

1. Pada tahun 2019, pengeluaran sektor perikanan di Malaysia disumbangkan oleh 1.87 juta tan metrik bagi ikan makan, 287.5 juta ekor bagi ikan hiasan dan 51.7 juta ikat bagi tumbuhan akuatik dengan nilai RM15.26 bilion secara keseluruhan. Dalam tahun yang sama, sumbangan Keluaran Dalam Negara Kasar (KDNK) bagi sub sektor perikanan kepada pertanian adalah sebanyak 12% manakala sumbangan KDNK kepada negara sebanyak 0.9%.

2. Dalam memastikan sektor perikanan negara mencatatkan sumbangan yang lebih besar kepada KDNK negara, Kementerian sedang merangka Dasar Agromakanan Negara 2.0 dan Pelan Pembangunan Perikanan Negara (2021- 2030). Kedua-dua pelan jangka panjang ini, merangkumi dasar dan pelan strategik untuk transformasi sektor perikanan negara secara holistik dengan memberi tumpuan kepada pendekatan baharu serta penambahbaikan secara berterusan.

3. Strategi jangka panjang yang dirangka oleh Kementerian untuk memodenkan industri perikanan dan membantu golongan nelayan adalah seperti berikut:

- i. Program pemodenan vesel penangkapan ikan untuk menggalakkan pengusaha vesel persisir pantai untuk pergi lebih jauh (laut dalam) dan meningkatkan pendaratan ikan dalam negara. Penggunaan teknologi akan diperkukuhkan bagi meningkatkan kecekapan dan produktiviti aktiviti penangkapan ikan;
- ii. Pembangunan industri akuakultur bagi mengurangkan kos input perikanan, kebergantungan terhadap benih import dan menggalakkan ternakan spesies ikan bernilai tinggi serta pelaburan swasta berasaskan teknologi tinggi akan

diperkukuhkan selaras dengan gelombang revolusi industri 4.0 (IR4.0);

- iii. Memperkasakan pembangunan modal insan belia khususnya nelayan tempatan melalui penyediaan modul latihan berkaitan pengoperasian penangkapan ikan dan pengoperasian vesel akan diwujudkan bagi mengurangkan penggantungan kepada tenaga kerja asing;
- iv. Pembangunan industri perikanan di sepanjang rantai nilai pemasaran ikan (*fisheries value chain*) akan dibangunkan bagi memendekkan rantai nilai seterusnya menstabilkan pendapatan nelayan serta harga ikan di pasaran;
- v. Menggalakkan lebih banyak bank komersial untuk menawarkan kemudahan kredit pada kadar faedah yang rendah bagi tujuan menarik minat golongan nelayan untuk terlibat dalam industri ini (*business friendly eco-system*); dan
- vi. memperkasakan kompleks perikanan Lembaga Kemajuan Ikan Malaysia (LKIM) sedia ada dengan mempertingkatkan kemudahan asas dan memperkenalkan SOP baharu yang mengutamakan pengendalian pendaratan hasil ikan berkualiti dan selamat selaras dengan piawaian di peringkat antarabangsa seperti pelaksanaan *Port State Measures*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 3 NOVEMBER 2020 (SELASA)

SOALAN

PUAN HANNAH YEOH TSEOW SUAN [SEGAMBUT] minta **MENTERI SUMBER MANUSIA** menyatakan apakah pendirian terbaharu Kementerian bagi menangani masalah kemasukan pekerja asing terutamanya dalam sektor domestik seperti pembantu rumah di dalam era baharu pasca COVID-19.

JAWAPAN

Tuan Yang Dipertua,

1. Untuk makluman Ahli-Ahli Dewan Yang Mulia ini, pada masa ini, kemasukan pekerja asing dan pekhidmat domestik asing telah dibekukan susulan daripada penularan pandemik COVID-19. Pembekuan kemasukan ini akan berterusan tertakluk kepada arahan Kementerian Kesihatan Malaysia dan Majlis Keselamatan Negara mengambil kira kawalan penularan pandemik ini.

2. Kerajaan sedang mengkaji pendekatan-pendekatan yang akan dilaksanakan dalam era baharu pasca COVID-19, di mana libat urus akan diadakan bersama pemegang-pemegang taruh dari kalangan majikan dan pekerja. Mekanisme-mekanisme yang bersesuaian akan dibincang dan diperhalusi antaranya pewujudan Pusat Asuhan Kanak-Kanak di premis majikan, penjenamaan semula bidang pekerjaan domestik disertakan dengan persijilan kemahiran dan sebagainya. Selain itu, Kementerian Sumber Manusia juga mengalu-alukan Yang Berhormat dan setiap ahli perwakilan dalam Dewan Yang Mulia ini membantu Kementerian mencadangkan inisiatif-inisiatif yang berkesan berhubung perkara ini.

3. Kementerian Sumber Manusia juga akan turut berbincang dengan Kerajaan negara sumber dalam memastikan kemasukan pekhidmat domestik asing lebih berstruktur, dilengkapi dengan kemahiran dan mengikut SOP kesihatan yang telah ditetapkan. Ini bagi memastikan pekhidmat domestik yang masuk ke negara ini adalah berkualiti dan mampu menjalankan kerja-kerja berunsurkan *housekeeping* dan *assigned responsibilities* seperti menjaga orang tua, bayi dan Orang Kurang Upaya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN TEH KOK LIM (TAIPING)

TARIKH : 3 NOVEMBER 2020 (SELASA)

SOALAN

TUAN TEH KOK LIM [TAIPING] minta **MENTERI DALAM NEGERI** menyatakan kos tahunan untuk menanggung warga asing yang ditahan dalam penjara/kem tahanan untuk 5 tahun terkini dan rancangan untuk mengurangkan bebanan tersebut.

JAWAPAN

Tuan Yang Di Pertua,

Untuk makluman Ahli Yang Berhormat, bagi tempoh 5 tahun iaitu dari tahun 2015 hingga 2019 terdapat seramai 428,466 banduan warga asing ditahan di seluruh institusi penjara Malaysia yang telah melakukan pelbagai kesalahan terutamanya kesalahan di bawah Akta Imigresen.

Kos penyelenggaraan banduan adalah melibatkan penyediaan peralatan, kemudahan, perubatan, makanan, kawalan, pengiringan, emolument kakitangan dan lain-lain. Sehubungan itu, kos keseluruhan bagi menyelenggara banduan warga asing di Jabatan Penjara Malaysia bagi tempoh 5 tahun iaitu dari tahun 2015 hingga 2019 adalah kira-kira RM 7.8 bilion.

Jabatan Penjara Malaysia telah mengambil beberapa langkah dalam mengurangkan tanggungan berkenaan, Antaranya ialah;

- i. Bekerjasama dengan Jabatan Imigresen Malaysia dan Kedutaan Asing bagi mempercepatkan proses penyediaan dokumen dan penghantaran balik banduan warganegara asing yang telah selesai menjalani hukuman;
- ii. Bekerjasama dengan pihak Mahkamah bagi mempercepatkan proses perbicaraan; dan
- iii. Melalui penggubalan Akta Pemindahan Antarabangsa Banduan 2012, Kerajaan mensasarkan agar banduan warganegara asing yang layak, yang ditahan di penjara Malaysia dapat dipindahkan ke negara asal bagi menjalani baki hukuman dan pemulihan di negara masing-masing. Berdasarkan statistik Jabatan Penjara Malaysia sehingga 21 Oktober 2020, seramai 2,056 banduan warganegara asing, yang melibatkan 32 negara, layak dipertimbangkan untuk dipindahkan ke negara asal melalui program ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB DATO' NGEH KOO HAM (BERUAS)

TARIKH : 3 NOVEMBER 2020 (SELASA)

SOALAN

DATO' NGEH KOO HAM [BERUAS] minta **MENTERI DALAM NEGERI** menyatakan apa sudah berlaku kepada kes-kes berikut :-

- (a) 680 warga Negara China yang ditangkap dalam satu bangunan 6 tingkat di Cyberjaya pada 20 November 2019 yang dikatakan terlibat dalam penipuan secara online ; dan
- (b) 104 warga Negara China yang ditangkap di Kota Kinabalu pada 26 November 2019 yang dikatakan terlibat dalam penipuan secara online.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Imigresen Malaysia (JIM) merekodkan jumlah sebenar warganegara China pada 20 November 2019 bagi kes melibatkan operasi penguatkuasaan di Cyberjaya yang diutarakan oleh Ahli Yang Berhormat adalah seramai 592 orang. Kesemua mereka disyaki melakukan kesalahan di bawah Akta Imigresen 1959/63, Akta Pasport 1966 dan Peraturan-peraturan Imigresen 1963. Hasil siasatan seramai 472 orang telah didakwa dan disabitkan kesalahan di Mahkamah Sesyen Sepang di bawah seksyen 6(1)(c) Akta Imigresen 1959/63 iaitu kesalahan tidak memiliki pas yang sah untuk berada di Malaysia, Seksyen 15(1)(c) Akta Imigresen 1959/63 bagi kesalahan tinggal melebihi tempoh masa Pas yang ditetapkan dan Peraturan 39(b) Peraturan-peraturan Imigresen iaitu melanggar syarat pas, permit atau pas sempadan pada 13 Disember 2019 dan 16 Disember 2019. Kesemua 472 orang tersebut dikenakan hukuman penjara 1 sehingga 3 bulan dan denda RM10,000. Manakala seramai 120 orang lagi telah dihantar pulang ke negara asal oleh JIM dengan syor Timbalan Pendakwa Raya.

Manakala bagi kes tangkapan 104 orang warganegara China di Kota Kinabalu pada 26 November 2020, kesemua mereka disyaki melakukan kesalahan di bawah Akta Imigresen 1959/63, Akta Pasport 1966 dan Peraturan-peraturan Imigresen 1963. Hasil siasatan seramai 99 orang telah didakwa dan disabitkan kesalahan di Mahkamah Sesyen Kota Kinabalu di bawah Seksyen 6(1)(c) Akta Imigresen 1959/63 dan Seksyen 15(1)(c) Akta Imigresen 1959/63 dengan hukuman denda RM5,000 setiap seorang. Manakala seramai 5 orang lagi dihantar pulang ke negara asal oleh JIM dengan syor Timbalan Pendakwa Raya.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN (MUAR)**

TARIKH : 3 NOVEMBER 2020 (SELASA)

SOALAN

TUAN SYED SADDIQ BIN SYED ABDUL RAHMAN (MUAR) minta
MENTERI KESIHATAN menyatakan:

- a) berapa kos tahunan yang ditanggung oleh Kementerian Kesihatan bagi program berhenti merokok seperti program mQuit; dan
- b) adakah Kementerian mempertimbangkan sumber dana alternatif seperti penyaluran pendapatan daripada duti eksais rokok dan tembakau untuk membiayai kos program berhenti merokok.

JAWAPAN

Tuan Yang di-Pertua,

1. Rawatan berhenti merokok yang dijalankan di Malaysia adalah mengikut Garis Panduan Klinikal: Rawatan Ketagihan Tembakau (*Clinical Practice Guidelines: Treatment of Tobacco Use Disorder*) yang dikeluarkan oleh pihak Kementerian pada tahun 2003 dan telah dikemaskini pada tahun 2016.

2. Garis panduan tersebut menjadi rujukan dan diguna pakai oleh semua pengamal perubatan di hospital dan klinik kesihatan yang menjalankan klinik berhenti merokok sejak tahun 2000. Merujuk kepada

garis panduan tersebut, terdapat dua kaedah rawatan berhenti merokok iaitu melalui:

- i) Kaunseling perubahan tingkah laku sahaja; atau
- ii) Kaunseling perubahan tingkah laku beserta rawatan farmakologi.

3. **Kos yang ditanggung oleh pihak KKM khusus bagi rawatan berhenti merokok adalah bagi kos rawatan farmakologi yang melibatkan dua jenis ubatan** iaitu:

- i) Terapi Pengganti Nikotin atau *Nicotine Replacment Therapy* termasuk Pelekat Nikotin (*Nicotine patch*) dan Gula-gula getah Nikotin (*Nicotine gum*); serta
- ii) Terapi pengganti bukan Nikotin atau *Partial Agonist for Nicotinic Acetylcholine Receptor* iaitu Varenicline.

4. Pihak Kementerian telah membelanjakan **sejumlah RM2.0 juta pada tahun 2018 bagi memberikan rawatan farmakologi kepada seramai 12,640 orang perokok**. Jumlah perbelanjaan ini **meningkat kepada RM 2.8 juta pada tahun 2019**. Namun, jumlah **mereka yang menerima rawatan farmakologi telah berkurangan kepada 9,222 orang atas faktor kenaikan harga ubatan semasa**.

Tuan Yang di-Pertua,

5. Bagi soalan kedua (b), iaitu berhubung sumber dana alternatif seperti penyaluran pendapatan daripada duti eksais rokok dan tembakau untuk membiayai kos program berhenti merokok, **Memorandum Jemaah Menteri (MJM) berkaitan Cadangan Kenaikan Cukai Rokok Secara Berkala telah dibentangkan pada tahun 2015**. Di dalam MJM tersebut, keperluan kewangan bagi membiayai kos rawatan berhenti merokok dengan menggunakan peruntukan khusus daripada hasil kutipan duti eksais rokok dan tembakau telah dicadangkan. Namun, **ianya tidak dipersetujui kerana di atas prinsip bahawa wang** dikumpulkan adalah di bawah

konsep kewangan disatukan dan pihak KKM boleh memohon peruntukan daripada pihak Kementerian Kewangan (MOF) mengikut prosedur dan proses kewangan biasa.

6. Seterusnya, pihak KKM juga telah membuat **permohonan bagi menampung kos rawatan berhenti merokok di bawah program Dasar Baru**. Sebagai contoh, pada tahun 2020 sebanyak RM 6.5 juta telah dipohon. Namun, **pihak KKM diminta untuk menggunakan peruntukan di bawah program belanja mengurus sedia ada**.

7. Sebagai perancangan, pada tahun 2020 dan sebagai alternatif kepada penambahan peruntukan, pihak KKM telah melaksanakan satu inisiatif di bawah *Public Private Partnership (PPP)* bersama badan professional, badan bukan kerajaan (NGO) dan agensi swasta di bawah program Perkhidmatan Berhenti Merokok mQuit. Perkhidmatan Berhenti Merokok mQuit telah bermula sejak fasa satu iaitu tahun 2015 hingga 2017. Fasa kedua pada 2017 hingga 2020 dan bakal memasuki fasa ketiga bermula 2021 sehingga 2025 dengan termetrainya Memorandum Persefahaman bersama pihak KKM. **Peruntukan kewangan bagi melaksanakan semua aktiviti dalam setiap fasa adalah ditanggung oleh badan professional, badan bukan kerajaan (NGO) dan agensi swasta yang terlibat**.

8. Pihak KKM juga telah menetapkan dasar agar rawatan berhenti merokok dapat dijalankan secara integrasi dalam rawatan penyakit kronik lain seperti darah tinggi, penyakit jantung, kencing manis dan lain-lain. Ini adalah bagi memastikan agar rawatan berhenti merokok dapat diperluaskan bukan sahaja di klinik kesihatan malahan di semua hospital KKM. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN TAN KOK WAI (CHERAS)

TARIKH : 3 NOVEMBER 2020 (SELASA)

SOALAN

TUAN TAN KOK WAI [CHERAS] minta **MENTERI DALAM NEGERI** menyatakan bilangan kematian warga emas umur 60 ke atas pada bulan Mac, April, Mei, Jun, Julai, Ogos, September tahun 2020 dan perbandingan dengan tahun 2017, 2018, 2019.

JAWAPAN

Tuan Yang Di-Pertua,

Berdasarkan rekod Jabatan Pendaftaran Negara (JPN) bagi tempoh bulan Mac hingga September 2020, sebanyak 62,176 kematian individu berumur 60 tahun dan ke atas telah didaftarkan dan direkodkan. Sebagai perbandingan bilangan kematian bagi tempoh yang sama untuk tiga tahun sebelumnya adalah seperti berikut :

1. Mac hingga September 2017 – 62,200 kematian.
2. Mac hingga September 2018 – 63,077 kematian.
3. Mac hingga September 2019 – 64,854 kematian.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 3 NOVEMBER 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan kesan pandemik COVID-19 terhadap sektor pertanian negara, situasi semasa bekalan makanan negara dan persediaan bekalan makanan bagi tempoh setahun akan datang.

JAWAPAN

Tuan Yang Dipertua,

1. Pelaksanaan Perintah Kawalan Pergerakan (PKP) susulan wabak COVID-19 telah mengganggu kelancaran rantai makanan antaranya pengeluaran, pemprosesan, pengedaran dan peruncitan produk hasil pertanian dan industri makanan. Kesan wabak ini juga telah menyebabkan permintaan produk-produk hasil pertanian, terutamanya daripada industri perhotelan dan perkhidmatan makanan, industri pemprosesan makanan serta peruncitan tradisional seperti pasar tani, pasar pagi, pasaraya serta *hypermarket* berkurangan kerana arahan penutupan dan waktu operasi yang minimum.
2. Sehubungan itu, permintaan terhadap bekalan makanan yang berkurangan telah mencetuskan isu lambakan hasil pertanian seperti sayur-sayuran dan buah-buahan yang berlaku di beberapa kawasan contohnya lambakan nanas di Johor dan lambakan sayur-sayuran di Lojing, Kelantan dan Cameron Highlands, Pahang yang terpaksa dibuang.
3. Susulan daripada isu lambakan tersebut, masalah penyimpanan dan pemprosesan turut berlaku menyebabkan pengusaha terpaksa menanggung kos penyimpanan stok selain meningkatkan risiko kerugian bagi lebihan produk yang tidak dapat disimpan serta dipasarkan.
4. Bagi mengurangkan isu lambakan hasil pertanian dan meminimumkan kerugian yang dialami, Kementerian Pertanian dan Industri Makanan (MAFI) melalui jabatan dan agensi seperti Lembaga Pemasaran Pertanian Persekutuan (FAMA) telah melaksanakan Program Pasar Segar Terkawal (PST). Pelaksanaan PST semasa PKP ini adalah signifikan bagi memastikan bekalan makanan negara stabil dan berterusan.
5. Bagi memastikan aktiviti petani, pekebun, penternak, nelayan dan usahawan tani tidak terjejas oleh COVID-19, MAFI melalui Pakej

Rangsangan Ekonomi (PRE), PRIHATIN dan PENJANA melaksanakan 36 inisiatif bagi merancakkan semula aktiviti pertanian dan pengeluaran makanan. Kementerian berharap agar inisiatif termasuk program dan projek serta bantuan khas ini dapat membantu meringankan bebanan kumpulan sasaran yang terkesan akibat COVID-19 malahan dapat membantu keseluruhan sektor ekonomi termasuk pengusaha agromakanan untuk kembali pulih dan meneruskan kelangsungan perusahaan masing-masing bagi merancakkan semula aktiviti pertanian dan melonjakkan sektor agromakanan negara serta memastikan sekuriti makanan terus terjamin sepanjang tempoh pemulihan ekonomi.

6. Buat masa ini, status sekuriti makanan (*food security*) negara termasuk bekalan makanan asas (beras, sayur, ayam, telur, daging dan ikan) berada pada tahap stabil dan terkawal walaupun negara menghadapi wabak COVID-19. Bagi sesetengah makanan seperti ayam, telur dan ikan telah mencapai tahap pengeluaran (SSL) melebihi 90%. Selain itu, negara masih bergantung kepada import beberapa makanan seperti beras, sayur (seperti cili, kubis dan bawang) dan daging lembu bagi memenuhi keperluan dalam negara.

7. Selain itu, Kerajaan melalui BERNAS telah memperuntukkan sebanyak 150,000 tan metrik pada setiap masa sebagai stok simpanan beras. Kedudukan stok beras di peringkat kilang, borong dan runcit masih berada pada tahap konsisten iaitu purata 400,000 - 500,000 tan metrik setiap bulan berbanding dengan keperluan bulanan negara iaitu sebanyak 200,000 tan metrik.

8. Justeru itu, sebagai persediaan bekalan makanan bagi tempoh setahun akan datang, beberapa langkah yang telah diambil oleh MAFI termasuk:

- (i) Meningkatkan stok penimbal beras bagi memastikan bekalan beras sentiasa terjamin di mana BERNAS menyimpan dan mengurus stok penimbal beras (stokpail) sedia ada iaitu sebanyak 150,000 tan metrik. Dalam hubungan ini, BERNAS telah diminta untuk

SOALAN NO : 34

menambah jumlah stokpail sebanyak 140,000 tan metrik lagi dengan anggaran kos sebanyak RM250 juta yang mana keseluruhan stokpail berjumlah 290,000 tan metrik ini akan disimpan di 6 zon utama negara serta kekal dilaksanakan dan ditanggung oleh BERNAS;

- (ii) Menyediakan prasarana, kemudahan logistik dan pengangkutan bagi membantu aktiviti pengumpulan hasil dan pemasaran seperti pasar tani dan nelayan, pusat pengumpulan dan pengedaran (CDC) serta lori sejuk beku;
- (iii) Meningkatkan bekalan beras daripada pelbagai sumber import daripada negara luar seperti Vietnam, India dan Pakistan; dan
- (iv) Melaksanakan Program Simpanan Bekalan Makanan (SBM) bagi menangani kenaikan kos sara hidup rakyat dan memastikan beberapa bahan makanan terpilih mempunyai bekalan yang terjamin dengan harga yang berpatutan kepada pengguna.

Sekian, terima kasih.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN
DARIPADA : TUAN YAMANI HAFEZ BIN MUSA [SIPITANG]
TARIKH : 3 NOVEMBER 2020 (SELASA)

SOALAN

TUAN YAMANI HAFEZ BIN MUSA [SIPITANG] minta **MENTERI KESIHATAN** menyatakan sejauh mana serius kes penyakit polio yang banyak dilaporkan kebelakangan ini, terutama di Sabah dan apakah Kementerian mempunyai vaksin mencukupi bagi memberikan rawatan kepada pesakit. Selain itu, bagaimana penyakit polio ini muncul kembali di Malaysia pada tahun 2019 setelah lama telah bebas daripada penyakit tersebut.

JAWAPAN

Tuan Yang di-Pertua,

1. Negara telah dikejutkan dengan pengesahan kes polio pertama pada 8 Disember 2019 di negeri Sabah, selepas kes polio terakhir dikesan 27 tahun yang lalu. Sehingga kini, **terdapat empat (4) kes disahkan polio di Sabah**, iaitu melibatkan pesakit berumur 3 bulan, 3 tahun, 8 tahun dan 11 tahun semasa disahkan mendapat jangkitan. Kes terakhir yang dilaporkan mula mendapat gejala kelumpuhan pada 18 Januari 2020.
2. Daripada empat (4) kes polio tersebut, **satu (1) kes masih dirawat di hospital kerana memerlukan alat bantuan pernafasan** manakala tiga (3) kes lagi masih mengalami lemah anggota kaki namun boleh berjalan dengan sokongan.
3. Selain daripada itu, melalui persampelan persekitaran yang dijalankan, **virus polio telah dikesan dalam 24 sampel air kumbahan yang diambil di Sabah, serta satu (1) sampel air kumbahan yang diambil di WP Labuan**. Sampel persekitaran positif yang terakhir dikesan virus polio adalah pada 13 Mac 2020.
4. Bagi mencegah penularan wabak polio di negeri Sabah, KKM melalui Jabatan Kesihatan Negeri telah menjalankan **Kempen Imunisasi Polio Sabah (KIPS) bagi menghentikan penularan virus polio**. Kempen ini dijalankan sejak daripada 27 Disember 2019, melibatkan pemberian dua (2) jenis vaksin oral polio (OPV) iaitu vaksin *bivalent oral polio jenis 1 dan 3* (bOPV) dan vaksin *monovalent oral polio jenis 2* (mOPV2) yang diberikan secara titisan ke dalam mulut. Dalam kempen ini, setiap kanak-kanak berumur bawah 13 tahun di seluruh negeri Sabah diberikan vaksin bOPV dan mOPV2, dengan setiap vaksin sebanyak dua (2) dos. Buat masa ini, bekalan vaksin bagi KIPS adalah mencukupi bagi menampung keperluan populasi kanak-kanak bawah 13 tahun di seluruh negeri Sabah.

5. Aktiviti kempen yang dijalankan juga agak perlahan semasa Perintah Kawalan Pergerakan (sejak 18 Mac 2020), namun telah dipergiatkan semula semasa Perintah Kawalan Pergerakan Pemulihan. Dengan peningkatan kes COVID-19 di negeri Sabah sejak kebelakangan ini, aktiviti kempen secara aktif terpaksa ditangguhkan di kawasan-kawasan yang merekodkan peningkatan kes COVID-19.

6. Walaupun terdapat banyak kekangan, pencapaian kempen adalah tetap baik. **Sehingga 21 Oktober 2020, seramai 815,846 (95.6%) orang kanak-kanak di Sabah telah menerima dua (2) dos vaksin bOPV, manakala 688,016 (80.6%) orang kanak-kanak di Sabah telah menerima dua (2) dos vaksin mOPV.**

7. Semenjak 18 Januari 2020, iaitu tarikh *onset* atau tarikh mula mengalami gejala kelumpuhan bagi kes terakhir, tiada lagi penambahan kes menunjukkan jangkitan polio di Sabah adalah terkawal.

8. Untuk makluman, di antara punca utama wabak polio di Sabah adalah disebabkan **mobilisasi yang tinggi di kalangan bukan warganegara**. Pergerakan mereka melibatkan rentas sempadan antara Sabah dan negara Filipina yang turut dilanda penularan polio sebelum ini. Tambahan pula, kebanyakan populasi bukan warganegara ini tidak mempunyai sebarang rekod imunisasi menyebabkan mereka berisiko tinggi mendapat jangkitan virus polio.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 3 NOVEMBER 2020 (SELASA)

SOALAN

Minta MENTERI PERTANIAN DAN INDUSTRI MAKANAN menyatakan perincian dan perkembangan terkini mengenai Program Agropreneur Muda di bawah Kementerian serta sambutan usahawan terutamanya usahawan muda dan luar bandar.

JAWAPAN

Tuan Yang di-Pertua,

1. Kementerian sentiasa mengemaskini dan memperbaharui program bersesuaian dengan keperluan semasa. Antara penambahbaikan yang dilaksanakan terhadap Program Agropreneur Muda adalah seperti berikut:

- i. Permohonan Geran Agropreneur Muda dibuka sepanjang tahun mulai Jun 2020 tanpa melalui 3 fasa permohonan seperti sebelumnya;
- ii. Program Jelajah Agropreneur Muda ke seluruh negeri yang berkonsepkan *walkabout*, pemantauan, taklimat dan latihan;
- iii. Kementerian melalui Unit Agropreneur Muda secara aktif menganjurkan kursus-kursus webinar, sesi taklimat Geran Agropreneur Muda dan perkongsian kisah-kisah kejayaan agropreneur muda secara langsung melalui *live streaming* di media sosial;

SOALAN NO : 36

- iv. Penganjuran Klinik Usahawan Agro di setiap negeri bertujuan menyampaikan maklumat berkaitan program dan bantuan insentif yang disediakan oleh Kementerian;
- v. Penjenamaan semula Skim Pembiayaan Khas agropreneur muda yang lebih mudah dan efektif; dan
- vi. Perancangan membangunkan Sistem Pembangunan Permohonan dan Pengurusan Geran Agropreneur Muda (e-GAM).

2. Program Agropreneur Muda mendapat sambutan yang amat menggalakkan sejak mula diperkenalkan pada tahun 2016 sehingga kini terutama daripada usahawan muda dari luar bandar.

3. Secara keseluruhannya, seramai 6,401 orang agropreneur muda seluruh negara telah menerima kelulusan Program Agropreneur Muda dari 1 Januari 2016 hingga 31 Ogos 2020 yang berjumlah RM 114.3 juta seperti berikut:

a) Sektor Tanaman	- 2,588 orang	(RM 45.1juta)
b) Sektor Perikanan	- 515 orang	(RM 10.9 juta)
c) Sektor Ternakan	- 1,246 orang	(RM 26.8 juta)
d) Sektor Industri Makanan	- 2,052 orang	(RM 31.5 juta)

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 3 NOVEMBER 2020 (SELASA)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI KESIHATAN** menyatakan apakah langkah yang diambil oleh Kerajaan supaya perkhidmatan saringan dan rawatan kesihatan mental sampai kepada masyarakat akar umbi memandangkan isu ini masih dipandang enteng oleh rakyat Malaysia, walaupun kedapatan prevalen mereka yang mengalami kemurungan dan kesihatan mental adalah tinggi.

JAWAPAN

Tuan Yang di-Pertua,

1. KKM telah mengambil pelbagai langkah bagi meningkatkan liputan saringan dan rawatan kesihatan mental di peringkat komuniti sebagai contoh:

- i. Pertama sekali, sejak tahun 1997, Kementerian Kesihatan telah melaksanakan **Perkhidmatan Saringan dan Rawatan Kesihatan Mental di peringkat kesihatan primer yang diberikan melalui 1001 klinik-klinik kesihatan sedia ada**, meliputi saringan kesihatan mental dan intervensi bagi individu yang dikenal pasti mengalami masalah kesihatan mental;
- ii. Kedua, perkhidmatan kesihatan mental dan psikiatri turut diberikan melalui **4 buah institusi mental, 66 buah hospital KKM dan 28 buah Pusat Kesihatan Mental Masyarakat (MENTARI) di seluruh Malaysia**. Perkhidmatan yang ditawarkan turut meliputi perkhidmatan pesakit luar, perkhidmatan psikiatri komuniti dan rehabilitasi agar pesakit dapat mengintegrasikan kembali ke dalam masyarakat;
- iii. Ketiga, liputan perkhidmatan kesihatan mental di peringkat komuniti juga telah dipertingkatkan melalui **pengwujudan inisiatif Program KOSPEN (Komuniti Sihat Pembina Negara) dan Program KOSPEN Plus** bagi warga kerja iaitu yang lebih memfokuskan kepada saringan kesihatan mental individu, meningkatkan kemahiran daya tindak pekerja serta kelompok sokongan pekerja.
- iv. Keempat, melaksanakan **Kempen Kesedaran Kesihatan Mental iaitu Let's Talk Minda Sihat** yang melibatkan pelbagai agensi kerajaan serta NGO dalam mempromosikan kesihatan mental dan advokasi kepada masyarakat untuk mendapatkan bantuan awal berkaitan masalah kesihatan mental yang dialami;

- v. Kelima, KKM bersama beberapa agensi kerajaan lain bersama-sama NGO turut mewujudkan **Talian Bantuan Sokongan Psikososial** bagi membantu individu yang memerlukan sokongan emosi terutamanya semasa pandemik COVID-19;
- vi. Keenam, KKM juga telah mengambil tindakan untuk menambah keperluan sumber manusia melalui **penempatan 200 orang pegawai psikologi kaunseling** di daerah-daerah seluruh Malaysia bagi memperkukuhkan perkhidmatan kesihatan mental di peringkat primer dan komuniti; dan
- vii. Yang terakhir sekali, bagi warga sekolah, **KKM dengan kerjasama Kementerian Pendidikan Malaysia (KPM) telah melaksanakan Program Minda Sihat Sekolah** bagi meningkatkan kesedaran kepentingan penjagaan kesihatan mental melalui saringan dan intervensi dalam menguruskan emosi serta meningkatkan kemahiran daya tindak kesihatan mental. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK ZAKARIA B. MOHD. EDRIS @ TUBAU
(LIBARAN)**

TARIKH : 3 NOVEMBER 2020 (SELASA)

SOALAN

DATUK ZAKARIA BIN MOHD. EDRIS @ TUBAU [LIBARAN] minta **MENTERI DALAM NEGERI** menyatakan apakah status perkembangan perintah berkurung ESSCOM di kawasan perairan tujuh daerah dalam Zon Selamat Timur Sabah (ESSZONE).

JAWAPAN

Tuan Yang Di Pertua,

Untuk makluman Ahli Yang Berhormat, Setakat ini, Polis Diraja Malaysia (PDRM) masih meneruskan Arahan Perintah Berkurung di Pantai Timur Sabah yang melibatkan tujuh buah daerah iaitu Tawau, Semporna, Kunak, Lahad Datu, Kinabatangan, Sandakan dan Beluran.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 3 NOVEMBER 2020 (SELASA)

SOALAN

TUAN AHMAD BIN HASSAN [PAPAR] minta **MENTERI WILAYAH PERSEKUTUAN** menyatakan pendekatan realistik yang sedang dilaksanakan oleh Kementerian bagi memastikan Inisiatif Usahawan Muda Kota dapat memberi nilai tambah kepada aktiviti keusahawanan '*urban youths*' yang sedia ada dari aspek kemapanan perniagaan.

JAWAPAN

Tuan Yang Di Pertua,

Untuk makluman Yang Berhormat Pagar, Program Pembangunan Usahawan Anak Muda Kota di Kuala Lumpur diwujudkan bagi menggalakkan penyertaan belia dalam bidang keusahawanan pasca pandemik COVID-19 terutamanya mereka yang hilang pekerjaan dan kekurangan punca pendapatan bagi membolehkan mereka menjana pendapatan melalui aktiviti perniagaan. Di samping itu, program ini turut bertujuan untuk memberi peluang kepada usahawan belia untuk berniaga di lokasi tumpuan orang ramai dengan memperbanyakkan kawasan perniagaan di lokasi tersebut khususnya di pusat bandar Kuala Lumpur. Sebanyak 1,122 kiosk dan ruang niaga disasarkan dalam tempoh 3 tahun mulai tahun 2020.

Bagi memastikan kemampanan perniagaan, usahawan diberi peluang untuk memilih pelbagai lokasi strategik (*hot spot*) untuk berniaga termasuklah di kawasan *River of Life* (RoL), pusat bandar, berhampiran perhentian bas dan teksi serta di pusat membeli-belah Berjaya Times Square. Di samping itu, bagi memastikan usahawan mendapat pulangan tunai harian yang cepat, jenis perniagaan yang dijalankan adalah seperti makanan dan minuman, *side walk cafe*, *mini convenience store*, cenderahati, perniagaan bergerak (*food truck*) serta lain-lain perkhidmatan seperti jahitan dan membaiki kasut.

Di samping itu, Kementerian Wilayah Persekutuan menawarkan kadar sewa yang lebih murah berbanding kadar pasaran dan bertindak memudahcara dari segi kemudahan sama ada dalam bentuk pemberian lesen perniagaan, pembiayaan perniagaan, pemasaran produk, khidmat nasihat perniagaan dan latihan peningkatan dalam bidang keusahawanan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN WONG TACK (BENTONG)

TARIKH : 3 NOVEMBER 2020 (SELASA)

SOALAN

TUAN WONG TACK [BENTONG] minta **MENTERI DALAM NEGERI** menyatakan status terkini (termasuk kos keseluruhan yang telah digunakan berbanding kos asal serta peratusan kerja yang telah disiapkan) dan perancangan lanjutan untuk projek Pusat Latihan Ketenteraman Awam (PULKA), Simpang Pelangai, Bentong yang telah sekian lama terbengkalai.

JAWAPAN

Tuan Yang Di Pertua,

Kos projek terkini bagi pelaksanaan projek pembinaan Pusat Latihan Ketenteraman Awam (PULKA), Simpang Pelangai, Bentong yang telah diluluskan oleh Unit Perancang Ekonomi (UPE), Jabatan Perdana Menteri (JPM) pada 13 Februari 2020 adalah RM204.46 juta. Daripada jumlah tersebut, sebanyak RM121.30 juta telah dibelanjakan sehingga bulan Oktober 2020.

Sehingga kini tiga (3) kontraktor yang dilantik telah ditamatkan kerana gagal menyiapkan projek dalam tempoh kontrak dan peratusan kemajuan projek bagi kontrak ketiga sebelum ditamatkan telah mencapai 83% kemajuan fizikal.

Pada masa kini, Kementerian Dalam Negeri (KDN) melalui Jabatan Kerja Raya selaku Agensi Pelaksana bagi projek ini sedang dalam proses melantik kontraktor ke-empat di mana iklan tender telah dikeluarkan pada 14 Oktober 2020 dan Surat Setuju Terima dijangka akan dikeluarkan pada bulan Januari 2021.

Pihak KDN ingin menjelaskan bahawa projek ini bukanlah projek terbengkalai tetapi ianya tidak dapat disiapkan sepenuhnya oleh ketiga-tiga kontraktor yang dilantik sebelum ini atas pelbagai faktor antaranya kelemahan pengurusan dan kewangan kontraktor itu sendiri. KDN sentiasa memberikan komitmen yang tinggi dalam menyiapkan semua projek-projek pembangunan termasuklah projek ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB PUAN TERESA KOK SUH SIM (SEPUTEH)

TARIKH : 3 NOVEMBER 2020 (SELASA)

SOALAN

PUAN TERESA KOK SUH SIM [SEPUTEH] minta **MENTERI DALAM NEGERI** menyatakan apakah penambahbaikan dan pembaharuan yang telah atau akan dilakukan dalam penjara, lokap di balai polis dan pusat tahanan imigresen demi mengelakkan penyebaran wabak COVID-19.

JAWAPAN

Tuan Yang Di Pertua,

Untuk makluman Ahli Yang Berhormat pihak Kementerian Dalam Negeri (KDN) melalui Jabatan Penjara Malaysia, Polis DiRaja Malaysia (PDRM) dan Jabatan Imigresen Malaysia (JIM) telah mengambil beberapa pendekatan proaktif bagi mengekang penularan wabak COVID-19 di dalam penjara, lokap dan pusat tahanan selaras dengan keputusan Sidang Khas Majlis Keselamatan Negara (MKN) COVID-19 bil. 29 tahun 2020 pada 15 Oktober 2020 yang telah bersetuju agar dilaksanakan ujian pengesanan COVID-19 kepada semua banduan dan tahanan semasa kemasukan bagi memastikan penularan COVID-19 di pusat-pusat tersebut dapat dicegah sepenuhnya.

Sebagai langkah pencegahan, Jabatan Penjara Malaysia telah mengeluarkan Perintah Tetap Komisioner Jeneral Penjara serta Pelan Kontingensi: Tatacara Mencegah Dan Bertindak Dalam Menghadapi Penularan Wabak COVID-19 Di Dalam Penjara. Jabatan Penjara Malaysia turut mempunyai Perintah Tetap Jabatan berhubung dengan ujian saringan COVID-19, yang mana telah menetapkan agar semua banduan sebelum diterima masuk ke penjara perlu mempunyai keputusan ujian saringan COVID-19.

Selain itu, Jabatan Penjara Malaysia juga mengambil langkah dalam mematuhi SOP yang telah ditetapkan oleh Kementerian Kesihatan Malaysia (KKM) untuk merawat, melaksanakan kuarantin dan mencegah penularan wabak tersebut kepada banduan dan kakitangan.

PDRM juga telah mengeluarkan Arahan Pentadbiran Bil. 12/2020 mengenai Garis Panduan Pengendalian Tahanan semasa Penularan COVID-19 bertarikh 1 April 2020 dan Arahan Pentadbiran Bil. 23/2020 bertarikh 16 Julai 2020 mengenai Garis Panduan Pengendalian Tahanan Pasca Covid-19 bertujuan memberi panduan kepada semua Pegawai Penjaga Lokap, Timbalan Pegawai Penjaga Lokap, Penyelia dan Pengawal Lokap berhubung pengendalian tahanan di lokap semasa penularan wabak

Covid-19. Selain itu, ia turut melibatkan carta alir penerimaan tahanan oleh pengawal lokap dan pengendalian tahanan lokap.

Terkini, PDRM sedang mengemaskini SOP lokap dan mempunyai perancangan untuk mengenalpasti satu (1) lokap yang boleh digunakan sebagai lokap transit bagi tujuan saringan untuk setiap daerah. Pihak KDN juga sedang menyelaraskan bersama PDRM bagi penyediaan bajet untuk PPE dan lain-lain keperluan berkaitan Covid-19.

Untuk makluman Ahli Yang Berhormat, pihak Jabatan Imigresen Malaysia juga telah mengambil langkah-langkah mengekang penularan wabak COVID-19 di kalangan tahanan dengan mewajibkan saringan COVID-19 ke atas semua tahanan baharu serta melakukan saringan gejala seperti demam, batuk dan selsema telah dilaksanakan secara berkala terhadap semua tahanan oleh Penolong Pegawai Perubatan yang bertugas di Depot Tahanan Imigresen. Tahanan yang mempunyai gejala akan diasingkan dan segera dibawa ke hospital atau klinik terdekat bagi mendapatkan rawatan.

Pihak JIM turut mendapatkan kerjasama daripada Jabatan Penjara Malaysia untuk menggunakan fasiliti penjara dan lain-lain fasiliti bagi tujuan penempatan tahanan imigresen untuk mengelakkan kepadatan yang terlalu tinggi di Depot Tahanan Imigresen sedia ada.

Dari aspek kesihatan tahanan, pihak JIM telah bekerjasama dengan KKM untuk menempatkan 14 orang Penolong Pegawai Perubatan di Depot Tahanan Imigresen di seluruh negara bagi memberikan rawatan awal kepada tahanan. Klinik kesihatan yang berhampiran juga telah dikenalpasti dan dipilih oleh KKM bagi memperkukuh perkhidmatan kesihatan di Depot Tahanan Imigresen serta berperanan sebagai pusat rujukan oleh Penolong Pegawai Perubatan yang dilantik dan sebagai pembekal keperluan perubatan ke depot-depot. Pemantauan kesihatan secara berkala turut dilakukan oleh KKM ke Depot Tahanan Imigresen dari masa ke semasa.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 3 NOVEMBER 2020 (SELASA)

SOALAN

TUAN SIM TZE TZIN [BAYAN BARU] minta **MENTERI PERTANIAN DAN INDUSTRI MAKANAN** menyatakan apakah masalah yang dihadapi oleh pesawah dari utara yang mengadu bahawa kelewatan benih padi sah dan harga benih yang melonjak ke RM60. Apakah perancangan menyeluruh Kementerian untuk menangani masalah yang berulang saban tahun.

JAWAPAN

Tuan Yang Dipertua,

1. Untuk makluman Ahli Yang Berhormat, Insentif Benih Padi Sah (IBPS) merupakan salah satu daripada program subsidi dan insentif yang diuruskan oleh Kementerian bagi membantu golongan sasaran dalam sektor padi dan beras iaitu pesawah padi. Ianya bermatlamat untuk membantu pesawah mengurangkan kos pengeluaran padi serta menggalakkan mereka menggunakan benih padi sah yang berkualiti, bermutu tinggi, rintang penyakit dan mengurangkan risiko padi angin.
2. Pada masa ini, mekanisme pengeluaran dan pembekalan benih padi sah dilaksanakan oleh kesemua syarikat pengeluar benih padi sah yang dilantik oleh Kerajaan sahaja. Walau bagaimanapun, Kerajaan menetapkan harga jualan di premis pengeluaran benih padi sah di pintu kilang berjumlah RM28.00 per beg (20 kilogram setiap beg) kepada sesiapa sahaja tanpa kawalan sama ada Pertubuhan Peladang Kawasan (PPK), ejen, syarikat, pelesen atau broker. Keadaan ini mengakibatkan manipulasi terhadap harga benih padi sah dibeli oleh pesawah yang melonjak kepada sekitar RM46 sehingga RM100 untuk setiap beg.
3. Sehubungan itu, Kementerian telah meneliti isu pengedaran benih padi sah ini dan setelah bertemu dengan pemegang taruh telah merangka hala tuju dan penambahbaikan program IBPS dari semasa ke semasa. Oleh yang demikian, Kementerian akan melaksanakan beberapa inisiatif bermula pada tahun 2021 seperti berikut:
 - i. Pertama, melantik Pertubuhan Peladang Kebangsaan (NAFAS) sebagai pemborong tunggal dalam program IBPS dan pembekalan diedarkan terus kepada pesawah. Pelantikan NAFAS sebagai pemborong tunggal untuk mengedarkan benih padi sah merupakan suatu kaedah penyelesaian terbaik dan bersepadu memandangkan NAFAS mempunyai kecekapan rangkaian di mana pengedaran benih padi sah oleh NAFAS melibatkan 148 PPK dalam kawasan padi di Semenanjung Malaysia. Pada masa yang sama, NAFAS juga akan memberi ruang kepada agen, individu atau syarikat sedia

ada yang berdaftar lesen dengan pihak Kementerian untuk mengedarkan benih padi sah. NAFAS juga mempunyai sumber kewangan yang kukuh serta kemampuan dan pengalaman NAFAS dalam pengedaran Skim Baja Padi Kerajaan Persekutuan (SBPKP) di seluruh negara.

- ii. Kedua, pelantikan NAFAS juga akan membolehkan penetapan harga siling benih padi sah dilaksanakan tanpa melibatkan tambahan peruntukan insentif kepada Kerajaan. Ianya juga akan mengelakkan manipulasi benih padi sah dan harga di lapangan menerusi pembelian tanpa kawalan oleh pelbagai pihak di pintu kilang.
- iii. Ketiga, lesen dan permit akan diberikan kepada agen, individu atau syarikat yang berdaftar dengan Kerajaan untuk mengedarkan benih padi sah;
- iv. Keempat, penetapan beberapa varieti benih padi sah yang akan dihasilkan oleh syarikat pengeluar benih padi sah untuk dipilih oleh pesawah; dan
- v. Kelima, menyediakan stok penimbun benih padi sah bagi menangani isu-isu krisis seumpama ini.

4. Justeru itu, sememangnya mekanisme penstrukturan semula keseluruhan rantai nilai yang dilakukan oleh Kerajaan ini adalah untuk menjamin mutu perkhidmatan di samping memberikan hak kepada pesawah untuk memilih benih padi yang terbaik bagi kegunaan sawah padi mereka. Pada masa yang sama, langkah-langkah penyelesaian ini dapat mengelakkan manipulasi benih padi sah dan harga di lapangan menerusi pembelian tanpa kawalan oleh pelbagai pihak di pintu kilang. Ianya penting bagi mengelak dominasi syarikat pembekal tertentu terhadap pasaran benih padi sah secara khususnya, dan sektor padi dan beras secara umumnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATUK DR. HASAN BIN BAHROM [TAMPIN]

TARIKH : 3 NOVEMBER 2020 (SELASA)

SOALAN

DATUK DR. HASAN BIN BAHROM [TAMPIN] minta **MENTERI PERTANIAN DAN INDUSTRI MAKANAN** menyatakan apakah tindakan susulan lebih konkrit dan mampan yang dilakukan oleh Kementerian bagi membantu para petani terutama para pengusaha tanaman secara kecil-kecilan yang terjejas dari pandemik COVID-19.

JAWAPAN

Tuan Yang Dipertua,

1. Kementerian Pertanian dan Industri Makanan (MAFI) mengambil berat impak yang dialami oleh para petani terutama para pengusaha tanaman secara kecil-kecilan yang terjejas dari pandemik COVID-19.
2. Sebagai tindakan susulan dan bagi memastikan aktiviti para petani dapat diteruskan walaupun terkesan dengan COVID-19, MAFI melalui Pakej Rangsangan Ekonomi (PRE), Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) telah merangka 36 inisiatif di bawah Dana Jaminan Makanan berjumlah RM1 bilion. Inisiatif-inisiatif tersebut dilaksanakan bagi merancakkan semula aktiviti pertanian dan pengeluaran makanan serta mendatangkan pendapatan kepada para pengusaha.

3. Di bawah PRIHATIN, MAFI diperuntukkan sebanyak RM190 juta bagi pelaksanaan program jaminan bekalan makanan melalui pemberian insentif input, peningkatan mobilisasi dan logistik bahan makanan serta pemantapan pembekalan stok makanan. Selain itu, Pertubuhan Peladang Kawasan (PPK) dan Pertubuhan Nelayan Kawasan (PNK) juga telah diperuntukkan dana khas untuk menggalakkan penglibatan dan aktiviti ahli peladang dan nelayan dalam industri pertanian dan makanan.
4. Di bawah PENJANA, MAFI telah diperuntukkan sebanyak RM350 juta untuk Skim Pembiayaan Mikro Kredit yang menawarkan bantuan kewangan dalam bentuk pinjaman dengan kadar faedah 3.5% bagi membantu meringankan beban pengusaha yang terkesan akibat COVID-19.
5. Selain itu, MAFI juga membantu para petani dan pengusaha meningkatkan ruang pemasaran melalui platform e-dagang seperti Agrobazaar Online dan NekmatBiz serta kerjasama strategik dengan syarikat swasta seperti Lazada, Shopee dan AirAsia.
6. Keseluruhan program / projek yang disenaraikan di bawah pakej-pakej PRE, PRIHATIN dan PENJANA sedang dilaksanakan melalui pelbagai jabatan / agensi di bawah MAFI.
7. Kementerian berharap agar inisiatif termasuk program dan projek serta bantuan khas ini dapat membantu meringankan bebanan kumpulan sasaran yang terkesan akibat COVID-19 malahan dapat membantu keseluruhan sektor ekonomi termasuk pengusaha agromakanan untuk kembali pulih dan meneruskan kelangsungan perusahaan masing-masing bagi merancakkan semula aktiviti pertanian dan melonjakkan sektor agromakanan negara serta memastikan sekuriti makanan terus terjamin sepanjang tempoh pemulihan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TERESA KOK SUH SIM [SEPUTEH]

TARIKH : 3 NOVEMBER 2020 (SELASA)

SOALAN

PUAN TERESA KOK SUH SIM [SEPUTEH] minta **MENTERI SUMBER MANUSIA** menyatakan bilangan kekosongan pekerja di sektor pertanian dan perladangan di negara kita. Apakah kerajaan akan membenarkan kemasukan pekerja asing ke sektor perladangan memandangkan ramai pekerja Malaysia tidak berminat untuk bekerja di sektor perladangan dan pertanian.

JAWAPAN

Tuan Yang di-Pertua,

1. Berdasarkan statistik permohonan pekerja asing dalam Sistem Pengurusan Pekerja Asing Bersepadu (ePPAx) di Jabatan Tenaga Kerja Semenanjung Malaysia (JTKSM), sehingga Mac 2020, terdapat sebanyak 22,095 kekosongan jawatan dalam sektor perladangan dan 15,622 kekosongan dalam sektor pertanian.
2. Dasar semasa kerajaan adalah mengutamakan pengambilan pekerja warganegara terlebih dahulu berbanding pekerja asing di semua sektor ekonomi. Kerajaan juga telah mengumumkan pembekuan pengambilan pekerja asing baharu sehingga 31 Disember 2020. Pembekuan ini adalah bagi mengekang pandemik COVID-19 yang melanda dunia terutamanya negara-negara sumber.
3. Dalam usaha meningkatkan penyertaan pekerja tempatan dalam sektor perladangan dan pertanian, pelbagai langkah telah diambil oleh Kerajaan untuk menarik minat pekerja tempatan menggantikan pekerja asing dalam sektor perladangan dan pertanian, di antaranya ialah:
 - i. Menetapkan kadar gaji minimum bagi menarik minat lebih ramai pencari kerja pekerja tempatan. Pada ketika ini, Kerajaan telah melaksanakan kadar gaji minimum RM1,200 sebulan bagi pekerja di wilayah bandar-bandar utama manakala RM1,100 sebulan bagi pekerja di luar wilayah bandar-bandar utama;
 - ii. menggalakkan sektor-sektor berintensifkan buruh beralih kepada penggunaan mekanisasi dan automasi;
 - iii. meningkatkan penyertaan Orang Kurang Upaya (OKU), pesara, bekas banduan, bekas penagih dadah dan gelandangan ke dalam pasaran pekerjaan;

- iv. memperkenalkan peraturan-peraturan kerja separa masa bagi menggalak dan mempertingkatkan penyertaan tenaga kerja tempatan khususnya suri rumah dan sebagainya; dan
 - v. kemudahan penginapan dan rumah ladang kepada pekerja-pekerja beserta kemudahan lain.
4. Selain itu, dalam tempoh pembekuan pengambilan pekerja asing ini, Kerajaan telah memanfaatkan pekerja asing sedia ada dalam negara dengan memperkenalkan inisiatif baharu dalam prose pertukaran majikan iaitu:
- i. Majikan yang menggajikan pekerja asing sedia ada boleh menyerahkan kesemua atau sebahagian pekerja asingnya jika tidak berkemampuan untuk meneruskan penggajian;
 - ii. pertukaran majikan ini boleh merentasi sektor (*cross sector*); dan
 - iii. majikan yang menyerahkan pekerja asing kepada majikan lain tidak akan disenaraihitamkan dan mereka akan dibenarkan memohon pekerja asing semula apabila keadaan ekonomi kembali pulih.
5. Walau bagaimanapun, permohonan pertukaran majikan perlu dibuat ke Kementerian Sumber Manusia (KSM) terlebih dahulu bagi mendapatkan perakuan sebelum proses temuduga dilakukan oleh Agensi Kawal Selia di *One Stop Centre* (OSC), Kementerian Dalam Negeri (KDN).
6. Kerajaan juga akan memperinci dan memperhalusi Pelan Rekalibrasi Pendatang Asing Tanpa Izin (PATI) yang akan dilaksanakan di Semenanjung Malaysia kelak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB PUAN WONG SHU QI (KLUANG)

TARIKH : 3 NOVEMBER 2020 (SELASA)

SOALAN

PUAN WONG SHU QI [KLUANG] minta **MENTERI DALAM NEGERI** menyatakan jumlah kanak-kanak yang sedang ditahan di Pusat Tahanan Imigresen seluruh negara dan jumlah kanak-kanak yang ditahan tanpa penjaga dalam pusat Tahan Imigresen.

JAWAPAN

Tuan Yang Di Pertua,

Untuk makluman Ahli Yang Berhormat, jumlah tahanan kanak-kanak di Depot Tahanan Imigresen setakat 26 Oktober 2020 adalah seramai 756 orang. Pecahan tahanan kanak-kanak mengikut jantina adalah 488 orang kanak-kanak lelaki dan 268 orang kanak-kanak perempuan.

Manakala, jumlah kanak-kanak yang ditahan tanpa penjaga di Depot Tahanan Imigresen adalah seramai 405 orang. Pecahan kanak-kanak tanpa penjaga mengikut warganegara adalah seperti berikut:

BIL.	WARGANEGARA	TANPA PENJAGA		JUMLAH
		KKL	KKP	
1.	BANGLADESH	0	0	1
2.	KEMBOJA	9	7	16
3.	CHINA	2	0	2
4.	INDIA	0	0	0
5.	INDONESIA	8	9	17
6.	LIBERIA	0	0	0
7.	MYANMAR	253	73	326
8.	NIGERIA	0	0	0
9.	PAKISTAN	1	0	1
10.	FILIPINA	1	3	4
11.	THAILAND	3	4	7
12.	VIETNAM	28	3	31
JUMLAH KESELURUHAN		306	99	405

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 3 NOVEMBER 2020 (SELASA)

SOALAN

TUAN LUKANISMAN BIN AWANG SAUNI [SIBUTI] minta **MENTERI KESIHATAN** menyatakan adakah pihak Kementerian mengesan berlakunya masalah malnutrisi di kalangan kanak-kanak akibat Perintah Kawalan Pergerakan kesan daripada Pandemik COVID-19.

JAWAPAN

Tuan Yang di-Pertua,

1. Malnutrisi boleh berlaku dalam dua (2) bentuk iaitu berlebihan dan kekurangan zat makanan. **Berlebihan zat makanan akan menyebabkan masalah berlebihan berat badan** manakala **kekurangan zat makanan menyebabkan masalah kurang berat badan, bantut (iaitu keadaan di mana kanak-kanak tersebut rendah berbanding umur mereka) serta susut (iaitu berat kanak-kanak tersebut tidak sesuai dengan ketinggian).**

2. **Semua kanak-kanak berumur bawah 5 tahun** perlu hadir ke klinik kesihatan atau Klinik Kesihatan Bergerak KKM untuk diukur berat dan tinggi bagi mengetahui taraf pemakanan mereka. Perkara ini dilaksanakan mengikut rutin temu janji dengan mengamalkan norma baharu yang ditetapkan semasa Perintah Kawalan Pergerakan. **Maklumat taraf pemakanan ini direkod dan dipantau melalui Sistem Maklumat Pengurusan Kesihatan.**

3. Hasil pelaporan sistem tersebut mendapati sehingga Jun 2020, terdapat **5,215 daripada 116,664 orang (4.5%)** kanak-kanak yang hadir ke klinik kesihatan KKM mengalami masalah kekurangan zat makanan dan **294 daripada 117,274 orang (0.25%)** kanak-kanak mengalami masalah berlebihan berat badan.

4. Oleh itu, saya mengambil kesempatan ini menyeru supaya para ibu bapa dan penjaga supaya membawa anak-anak ke klinik kesihatan kerajaan atau swasta bagi mengetahui taraf pemakanan, kesihatan dan perkembangan mereka. Anggota kesihatan di Kementerian Kesihatan sentiasa bersedia memberi nasihat dan tunjuk ajar mengenai kesihatan dan pemakanan.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : TUAN HASSAN BIN ABDUL KARIM
[PASIR GUDANG]

TARIKH : 3 NOVEMBER 2020 (SELASA)

SOALAN

TUAN HASSAN BIN ABDUL KARIM [PASIR GUDANG] minta MENTERI SUMBER MANUSIA menyatakan apakah hasil yang telah dicapai sejak Kementerian Sumber Manusia menubuhkan Portal Perkhidmatan Pekerjaan Nasional yang bernama *MYFutureJobs*.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kementerian Sumber Manusia telah memperkenalkan Portal Perkhidmatan Pekerjaan Nasional (*National Employment Services Job Portal*) yang dikenali sebagai **MYFutureJobs**. Portal ini telah dapat melancarkan lagi proses perkhidmatan pekerjaan dan juga telah digunakan sebagai platform dalam melaksanakan Program Insentif Pengambilan Pekerja (*Hiring Incentive Programme*).
2. Hasil daripada pelaksanaan Portal *MYFutureJobs* dari Januari 2020 sehingga Mei 2020, sebanyak 54,988 kekosongan jawatan dan 67,000 pencari kerja telah didaftarkan. Portal *MYFutureJobs* telah dijadikan sebagai Portal Perkhidmatan Pekerjaan Nasional pada bulan Jun 2020. Melalui publisiti dan perhatian yang meluas, portal *MYFutureJobs* telah berjaya dan memberi impak yang signifikan di

mana dari Jun sehingga 22 Oktober 2020, sebanyak 301,244 kekosongan jawatan dan 294,256 pencari kerja telah didaftarkan.

3. Portal *MYFutureJobs* telah berjaya memadankan calon-calon pencari kerja. Statistik pencapaian dari Jun 2020 sehingga 22 Oktober 2020 adalah seperti berikut;

- a) Pertamanya, seramai **4,433** perantis telah berjaya ditempatkan di bawah program ***MyApprentice***;
- b) Kedua, program ***HireMalaysia*** dimana seramai **51,020** pekerja berjaya ditempatkan bagi umur bawah 40 tahun ke bawah dan **7,705** orang pekerja bagi 40 tahun ke atas;
- c) Ketiga adalah Insentif Pengambilan Pekerja Tempatan dari golongan **Orang Kurang Upaya (OKU)**. Seramai **322** Orang Kurang Upaya (OKU) berjaya ditempatkan;
- d) Keempat adalah **Bantuan Mobiliti**. Seramai **3,477** orang pekerja telah mendapat faedah melalui Bantuan Mobiliti ini; dan
- e) Kelima adalah Program **latihan**. Seramai **7,759** orang pekerja telah mendapat manfaat untuk mengikuti program latihan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 3 NOVEMBER 2020 (SELASA)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI WILAYAH PERSEKUTUAN** menyatakan jumlah unit PPR/PA yang disewa berbanding jumlah keseluruhan, jumlah permohonan rumah PPR/PA setakat ini, dan apakah langkah Kementerian untuk membantu lebih ramai warga miskin kota menyewa rumah PPR/PA.

JAWAPAN

Tuan Yang Di Pertua,

Untuk makluman Yang Berhormat Lembah Pantai, jumlah unit PPR/PA yang telah disewakan adalah sebanyak 35,507 unit sehingga 15 Oktober 2020. Manakala jumlah permohonan yang berdaftar dan masih aktif dalam Sistem ePerumahan sehingga 15 Oktober 2020 adalah sebanyak 37,054 pemohon.

Bilangan permohonan yang telah lulus namun masih belum ditawarkan unit adalah sebanyak 1,116 orang dan ianya tertakluk kepada semakan pemilikan harta dengan Lembaga Hasil Dalam Negeri (LHDN) dan juga kekosongan unit yang telah sedia untuk ditawarkan.

Dewan Bandaraya Kuala Lumpur (DBKL) sentiasa memberi keutamaan kepada warga miskin yang amat memerlukan bantuan rumah sewa tetapi ianya tertakluk kepada jumlah kekosongan unit yang amat terhad dan sentiasa berubah dari semasa ke semasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB PUAN JUNE LEOW HSIAD HUI
[HULU SELANGOR]**

TARIKH : 3 NOVEMBER 2020 (SELASA)

SOALAN

YB PUAN JUNE LEOW HSIAD HUI [HULU SELANGOR] minta **MENTERI SUMBER MANUSIA** menyatakan langkah proaktif Kementerian bagi membantu graduan untuk memasuki pasaran kerja ketika berhadapan situasi pandemik COVID-19 yang mencabar di negara ini.

JAWAPAN

Tuan Yang di-Pertua,

Untuk makluman Ahli Yang Berhormat,

1. Bagi membantu graduan yang baru memasuki alam pekerjaan, Kerajaan telah menubuhkan Jawatankuasa Khas Pekerjaan Nasional dimana jawatankuasa tersebut akan memberi fokus kepada perkara berikut iaitu:

- (i) Pertama: **Rancangan jangka masa pendek** bagi **menangani kadar pengangguran** yang tinggi mengikut industri seperti pelancongan, hiburan dan lain-lain;
- (ii) Kedua: **Rancangan jangka masa panjang** dengan meningkatkan *value chain* sumber manusia melalui program **upskilling dan reskilling**; dan
- (iii) Ketiga: Mempromosi, membantu dan melindungi **hak serta kebajikan pekerja ekonomi gig**.

Tuan Yang di-Pertua,

2. Kementerian Sumber Manusia menerusi Pembangunan Sumber Manusia Berhad akan **mewujudkan *single window* bagi penyelarasan program peningkatan kemahiran (*upskilling* dan *reskilling*)** merentasi lapan (8) Kementerian dan Agensi bagi meningkatkan kebolehpasaran pencari kerja terutama golongan belia.

3. Melalui program kemahiran dan peningkatan kemahiran ini yang diselaraskan oleh PSMB ini, agensi-agensi seperti Kementerian Pengajian Tinggi (KPT), Kementerian Belia dan Sukan (KBS) dan MARA telah merancang dan akan menjalankan program-program yang memfokuskan

kepada lepasan graduan dan belia. Menerusi program ini juga, para peserta akan dilengkapi dengan pelbagai kemahiran tambahan bagi meningkatkan tahap kebolehkeraan mereka dan seterusnya mengisi kekosongan pekerjaan yang ditawarkan oleh pihak majikan kelak.

4. Kerajaan memandang serius **kebajikan pekerja ekonomi gig** dan menerusi PERKESO telah menyediakan perlindungan keselamatan sosial kepada pekerja ekonomi gig menerusi Akta Keselamatan Sosial Pekerjaan Sendiri 2017 (Akta 789). Melalui Akta ini, pekerja ekonomi gig akan diberi perlindungan di bawah Skim Bencana Kerja jika mereka ditimpa kemalangan atau menghidap penyakit berkaitan pekerjaannya.

5. Melalui Pelan Jana Semula Ekonomi Negara, Kerajaan telah mengumumkan Program Penjana Gig bagi memberi perlindungan keselamatan sosial dan menjaga kebajikan golongan Orang Bekerja Sendiri yang melibatkan aktiviti pekerjaan ekonomi gig.

6. Bagi mewujudkan lebih banyak peluang pekerjaan kepada rakyat Malaysia yang kehilangan pekerjaan akibat COVID-19, beberapa inisiatif sedang dan akan dilaksanakan oleh Kerajaan. Antaranya adalah:

- a. Meningkatkan pelaburan nilai tinggi melalui *Foreign Direct Investment* (FDI) dan *Domestic Direct Investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker (k-worker)* agar kadar upah yang lebih tinggi dapat dinikmati oleh golongan ini;
- b. Melaksanakan latihan-latihan kemahiran yang bersifat *internship* seperti Sistem Latihan Dual Nasional (SLDN) untuk meningkatkan jumlah peluang pekerjaan berkemahiran tinggi;
- c. Menyediakan insentif-insentif untuk syarikat bagi memperbanyakkan elemen-elemen berteknologi tinggi yang

dijangka akan meningkatkan jumlah peluang pekerjaan berkemahiran tinggi; dan

- d. Mengadakan sesi libat urus bersama industri bagi membincangkan isu sekaligus mengambil langkah-langkah untuk mengurangkan kebergantungan terhadap pekerja asing.

7. Bagi menyokong usaha-usaha di atas, Kerajaan harus menyediakan pekerja-pekerja berkemahiran yang memenuhi keperluan industri. Sehubungan itu, beberapa langkah sedang diambil oleh Kementerian, antaranya:

- e. Program *upskilling* dan *reskilling* disediakan kepada golongan pekerja. Ini bertujuan untuk mempertingkatkan kemahiran mereka untuk menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dijalankan secara berterusan supaya kemahiran yang diperolehi sentiasa bersesuaian dengan keperluan industri semasa;
- f. Kementerian Sumber Manusia (KSM) melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi yang mana telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry Lead Body* (ILB) adalah mengikut keperluan industri dan teknologi terkini;
- g. Memperluaskan akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat lima ratus enam puluh dua (562) buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan

SOALAN NO : 49

- h. KSM dan Kementerian Pengajian Tinggi (KPT) telah diberikan peranan sebagai Pengerusi bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaras dan melaksanakan usaha-usaha dalam memperkukuhkan kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling* dan *reskilling* yang disediakan kepada golongan pelajar kemahiran dan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 3 NOVEMBER 2020 (SELASA)

SOALAN

TUAN CHOW KON YEOW [TANJUNG] minta **MENTERI ALAM SEKITAR DAN AIR** menyatakan huraikan status terkini pelaksanaan projek Rancangan Tebatan Banjir (RTB) Sungai Pinang. Apakah punca kelewatan, perancangan baru dan kos terkini projek berkaitan.

JAWAPAN

Tuan Yang Di-Pertua,

1. Projek Rancangan Tebatan Banjir (RTB) Lembangan Sungai Pinang, Pulau Pinang telah diluluskan dalam Rancangan Malaysia Ke-Sebelas (RMKe-11) dengan kos projek berjumlah RM150 juta dan akan diteruskan dalam RMKe-12.
2. Kementerian Alam Sekitar dan Air (KASA) telah melantik Jurutera Perunding pada Mac 2019 bagi kerja-kerja rekabentuk terperinci bagi menentukan rekabentuk dan opsyen kerja fizikal yang terbaik bagi menangani masalah banjir di Lembangan Sungai Pinang.

NO. SOALAN : 50

3. Projek Rancangan Tebatan Banjir (RTB) Lembangan Sungai Pinang ini masih di peringkat rekabentuk terperinci. Rekabentuk terperinci dijangka siap pada 16 April 2021. Kelewatan di peringkat rekabentuk terperinci ini disebabkan pelaksanaan Perintah Kawalan Pergerakan (PKP) yang diumumkan oleh Kerajaan pada 18 Mac 2020 dan terdapat pertambahan jarak dalam kerja-kerja ukur kejuruteraan parit utama.
4. Pelaksanaan kerja fizikal RTB Lembangan Sungai Pinang dijadual pada bulan Ogos 2021 dan dijangka siap pada pertengahan Julai 2025.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : YB PUAN YEO BEE YIN [BAKRI]

TARIKH : 3 NOVEMBER 2020 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan status terkini pindaan Akta Kualiti Alam Sekeliling dan penggubalan Akta Pencemaran Merentas Sempadan.

JAWAPAN

Tuan Yang di-Pertua,

Untuk makluman Ahli Yang Berhormat,

1. Kementerian telah meneliti draf pindaan Akta Kualiti Alam Sekeliling 1974 [*Akta 127*] bersama pakar undang-undang alam sekitar. Berdasarkan penelitian Kementerian, draf pindaan akta ini adalah komprehensif dan holistik serta memerlukan pelaksanaan sesi libat urus bersama pihak berkepentingan khususnya agensi kerajaan, pertubuhan bukan kerajaan, pihak industri dan pemegang taruh yang berkaitan.
2. Kementerian berhasrat untuk memantapkan Akta 127 ini secara menyeluruh termasuk dalam elemen-elemen berikut iaitu:
 - (i) memasukkan elemen perubahan iklim;
 - (ii) pelestarian alam sekitar; dan

(iii) penalti kepada kesalahan yang lebih berat.

3. Disebabkan keperluan yang mendesak, pindaan kepada penalti kepada kesalahan akan diutamakan dahulu susulan beberapa insiden pencemaran sungai yang telah menyebabkan gangguan bekalan air mutakhir ini.

4. Kementerian akan melaksanakan pindaan Akta 127 secara berfasa. Dalam hubungan ini, fasa pertama akan memberi fokus kepada elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar.

Ahli Yang Berhormat,

5. Kementerian juga telah meneliti kewajaran penggubalan Rang Undang-Undang Pencemaran Alam Sekitar Merentas Sempadan dari pelbagai sudut merangkumi kebolehlaksanaan undang-undang yang akan digubal, hubungan diplomatik dan elemen pencegahan pencemaran alam sekitar. Berdasarkan penelitian yang telah dibuat, Kerajaan tidak akan meneruskan cadangan penggubalan Rang Undang-Undang Pencemaran Alam Sekitar Merentas Sempadan. Perkara ini mengambil kira maklumbalas daripada pakar undang-undang berkenaan kesukaran mendapatkan maklumat yang diperlukan bagi tujuan pendakwaan.

6. Sekiranya RUU Pencemaran Alam Sekitar Merentas Sempadan ini dikuatkuasakan, bukti jelas bahawa punca jerebu merentas sempadan yang berlaku adalah berpunca dari negara jiran perlu disokong oleh data-data yang mencukupi seperti peta lokasi, koordinat, maklumat pemilik tanah dan syarikat yang beroperasi di lokasi kebakaran. Perkara ini melibatkan kerahsiaan, keselamatan dan kedaulatan negara punca jerebu. Selain itu, maklumat syarikat berkaitan Malaysia yang beroperasi di negara luar juga sukar diperoleh memandangkan ekuiti majoriti dipegang oleh rakyat tempatan di negara syarikat beroperasi.

7. RUU Pencemaran Alam Sekitar Merentas Sempadan juga didapati tidak selari dengan prinsip ASEAN, di mana sekiranya terdapat sebarang pertikaian di kalangan negara ahli, perkara tersebut perlu ditangani secara rundingan (*amicably*). Pelaksanaan perkara ini boleh menjejaskan hubungan baik yang telah terjalin antara Malaysia dan Indonesia. Semua isu yang dihadapi sewajarnya ditangani secara rundingan bersama serta melalui platform di bawah *ASEAN Agreement on Transboundary Haze Pollution* (AATHP).

8. Pelbagai pendekatan boleh diambil kira untuk dilaksanakan bagi menangani pencemaran alam sekitar terutamanya isu jerebu merentas sempadan dan tidak hanya dengan penggubalan undang-undang semata-mata. Isu jerebu merentas sempadan tidak dapat diselesaikan hanya dengan penggubalan undang-undang semata-mata.

9. Pendekatan secara diplomasi dan rundingan adalah jalan yang lebih baik untuk menangani isu jerebu merentas sempadan secara kolektif. Dalam hal ini, Kerajaan akan melaksanakan pendekatan secara holistik melalui hubungan diplomatik yang erat dan kerjasama teknikal bagi memantapkan lagi keupayaan antara negara khususnya dalam bidang penyelidikan, teknologi berkaitan pengurusan tanah gambut serta operasi pemadaman kebakaran. Perkara ini juga adalah selaras dengan Artikel 16 – Kerjasama Teknikal dan Artikel 17 – Kajian Saintifik, Perjanjian ASEAN mengenai Jerebu Merentas Sempadan yang menekankan perkongsian kepakaran teknologi, teknik dan pengetahuan serta menyokong pelaksanaan penyelidikan saintifik dan teknikal berhubung pengurusan kebakaran tanah gambut dan hutan serta kaedah pemadaman kebakaran yang berkesan.

10. Selain itu, Kerajaan juga akan meneliti dan menambahbaik pelan komunikasi insiden jerebu merentas sempadan bagi memastikan penyampaian maklumat yang tepat, berkesan serta mengelakkan pertikaian yang mengeruhkan hubungan diplomatik Malaysia dengan negara jiran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN KARUPAIYA A/LMUTUSAMI
(PADANG SERAI)**

TARIKH : 3 NOVEMBER 2020 (SELASA)

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan bangunan baru untuk Imigresen di kawasan Parlimen Padang Serai memandangkan pejabat Imigresen yang sedia ada menyewa di premis kedai dan tidak mempunyai tempat parkir, tandas dan tempat menunggu untuk kegunaan pelanggan.

JAWAPAN

Tuan Yang Di Pertua,

Untuk makluman Ahli Yang Berhormat, sebarang cadangan untuk pembukaan pejabat baharu atau penaiktarafan pejabat sedia ada memerlukan perancangan dan perundingan yang strategik dengan mempertimbangkan semua faktor termasuk unjuran pelanggan, akses, peruntukan kewangan, kesesuaian serta kesediaan lokasi, sumber manusia dan sebagainya.

Sehubungan itu, Kementerian akan meneliti keperluan pembukaan pejabat imigresen baharu di Padang Serai secara komprehensif. Namun begitu, sebagai pilihan, para penduduk di kawasan Parlimen Padang Serai boleh mendapatkan perkhidmatan di Pejabat Imigresen Kulim yang berhampiran.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HASAN BIN ARIFIN [ROMPIN]

TARIKH : 3 NOVEMBER 2020 (SELASA)

SOALAN

DATO' SRI HASAN BIN ARIFIN [ROMPIN] minta **MENTERI SUMBER MANUSIA** menyatakan Kerajaan telah melaksanakan beberapa langkah dan strategi baru ke arah merangsang pertumbuhan ekonomi negara. Tetapi hasilnya kita dapati tidak dimanfaatkan oleh pekerja-pekerja tempatan dan menyebabkan gaji mereka tidak meningkat. Sebaliknya kenaikan gaji dalam sektor-sektor tertentu dimanfaatkan oleh pekerja-pekerja asing. Apakah langkah Kerajaan untuk memastikan perkara ini tidak berterusan dengan menyebabkan kerugian besar kepada rakyat tempatan.

JAWAPAN

Tuan Yang di-Pertua,

1. Kerajaan sentiasa mengambil pendekatan dengan mengutamakan rakyat tempatan dalam mengisi peluang pekerjaan. Pengambilan pekerja asing adalah langkah terakhir yang diambil apabila terdapat kekurangan penawaran untuk bekerja daripada pekerja tempatan. Antara langkah-langkah yang dilaksanakan oleh Kerajaan untuk mengurangkan kebergantungan terhadap tenaga buruh luar negara adalah seperti berikut:

- (i) menggalakkan sektor-sektor yang berintensifkan buruh beralih kepada penggunaan mekanisasi dan automasi bagi mengurangkan kebergantungan kepada pekerja asing;
- (ii) mempromosi peluang pekerjaan dan memudahkan penempatan pencari kerja tempatan melalui program penempatan pekerjaan yang dilaksanakan menerusi aktiviti temuduga terbuka semasa karnival pekerjaan Jabatan/Agensi di bawah KSM seperti JTK, PSMB, PERKESO dan TalentCorp;
- (iii) melaksanakan program *place and train* iaitu melatih pekerja tempatan bagi tujuan menggantikan pekerja asing yang mahir; dan
- (iv) meningkatkan aktiviti pemeriksaan berkanun terhadap majikan dan menambah baik sistem pengurusan pekerja asing sedia ada bagi tujuan pemantauan penggajian pekerja asing di semua sektor melibatkan semua agensi Kerajaan yang berkaitan agar pemantauan yang lebih berkesan dapat dijalankan.

2. Pertumbuhan ekonomi yang mampan mampu menjana peluang-peluang pekerjaan kepada rakyat tempatan. Kerajaan sentiasa berusaha untuk membantu industri meningkatkan peratusan upah yang lebih mampan dalam Keluaran Dalam Negara Kasar (KDNK). Antara pendekatan yang dilaksanakan oleh Kerajaan ialah:-

- (i) menggalakkan industri menambah nilai kerja melalui inovasi dan kreativiti berasaskan elemen automasi berteknologi tinggi. Ini dapat meningkatkan produktiviti pekerja dengan merangsang rangkaian pengeluaran seterusnya industri akan lebih berdaya saing di peringkat antarabangsa; dan
- (ii) bersifat selektif dengan menarik lebih banyak pelaburan langsung asing (*Foreign Direct Investment*, FDI) atau pelaburan langsung domestik (*Domestic Direct Investment*, DDI). FDI dan DDI dapat mencipta peluang pekerjaan *high value job* dan *knowledge worker* dengan mengurangkan pelaburan yang berintensif buruh dan bergaji rendah. Peluang pekerjaan *high value job* akan membolehkan rakyat memperoleh kadar gaji yang lebih tinggi.

3. Usaha Kerajaan melaksanakan gaji minimum mulai tahun 2012 sehingga sekarang, untuk menetapkan gaji lantai (*floor wages*) telah memberi manfaat kepada rakyat dengan memberi jaminan pendapatan kepada pekerja kategori paling bawah. Malah, majikan dan pekerja boleh berunding bagi menetapkan gaji pokok yang lebih tinggi daripada kadar gaji minimum setimpal dengan kelayakan dan kemahiran. Dasar gaji minimum telah menarik minat lebih ramai pekerja tempatan ke dalam pasaran buruh dan tidak hanya dimanfaatkan oleh pekerja-pekerja asing dalam sektor-sektor tertentu sahaja.

4. Kerajaan sentiasa menjalankan kajian sebelum memperkenalkan kadar gaji minimum yang baharu. Sebarang kenaikan kadar gaji minimum wajar dilaksanakan secara berperingkat agar majikan tidak terbeban dengan kos operasi yang meningkat secara mendadak lalu menjejaskan peluang pekerjaan.

5. Sejak pelaksanaannya, dasar gaji minimum telah banyak memberi faedah kepada rakyat seperti:-

- (i) meningkatkan pendapatan purata bulanan isi rumah yang seterusnya membantu rakyat dalam menampung kos keperluan asas seperti tempat tinggal, makanan dan pakaian;

- (ii) mengurangkan jurang gaji antara rakyat seterusnya menyumbang ke arah penambahbaikan standard kualiti hidup rakyat Malaysia secara keseluruhannya;
- (iii) meningkatkan pendapatan pekerja melalui kadar bayaran kerja lebih masa (*overtime*) yang lebih tinggi;
- (iv) perlindungan sosial yang lebih terjamin dengan peningkatan caruman Kumpulan Wang Simpanan Pekerja (KWSP) dan Pertubuhan Keselamatan Sosial (PERKESO); dan
- (v) meningkatkan kuasa membeli (*purchasing power*) rakyat yang akan memangkin pembangunan ekonomi negara.

Tuan Yang di-Pertua,

6. Konvensyen ILO No.100: *Equal Remuneration* yang telah diratifikasikan oleh Malaysia pada tahun 1997 antara lain menggariskan bahawa dasar gaji minimum hendaklah tidak mendiskriminasi seseorang pekerja atas alasan kewarganegaraan. Selain itu, Malaysia juga telah meratifikasi Konvensyen ILO iaitu *Convention No. 131: Minimum Wage Fixing Convention*, 1970 (C131) pada 7 Jun 2016 yang menetapkan Malaysia bertanggungjawab memastikan tidak wujud sebarang bentuk diskriminasi berhubung pelaksanaan dasar gaji minimum di negara ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB ALICE LAU KIONG YIENG (LANANG)

TARIKH : 3 NOVEMBER 2020 (SELASA)

SOALAN

YB ALICE LAU KIONG YIENG [LANANG] minta **MENTERI DALAM NEGERI** menyatakan:-

- (a) tujuan dan rasional Kerajaan Perikatan Nasional menarik balik RUU IPCMC memandangkan perbandingan antara dua RUU (oleh SUARAM) menunjukkan kuasa IPCC jauh lebih lemah berbanding IPCMC dan juga lebih teruk daripada mekanisme sedia ada di bawah Suruhanjaya Integriti Agensi Penguatkuasaan (EAIC); dan
- (b) apakah rancangan Kerajaan seterusnya.

JAWAPAN

Tuan Yang Di Pertua,

Keputusan untuk menggubal RUU IPCC adalah kerana secara umumnya RUU IPCMC tidak mempunyai elemen semak dan imbang. RUU IPCMC menjurus kepada pemusatan kuasa di mana ia mempunyai fungsi untuk menjalankan siasatan dan pada masa yang sama turut menjalankan fungsi kawalan tatatertib.

Manakala RUU IPCC lebih mengamalkan prinsip pengasingan kuasa selaras dengan sistem pentadbiran negara. IPCC hanya berperanan untuk menjalankan siasatan dan mengesyorkan tindakan tatatertib ke atas anggota pasukan polis kepada SPP tanpa menentukan jenis hukuman. Keadaan ini menjadikan kuasa "*hire and fire*" bagi anggota pasukan polis adalah kekal di bawah bidang kuasa badan yang sama.

Kerajaan berkeyakinan bahawa Suruhanjaya Bebas Tatakelakuan Polis (IPCC) yang akan ditubuhkan kelak mampu menangani salah laku anggota pasukan polis kerana ianya bersifat tertumpu kepada satu agensi penguatkuasa sahaja iaitu Polis Diraja Malaysia.

Selain itu, Rang Undang-Undang baharu yang digubal ini telah mengambil kira Laporan Jawatankuasa Pilihan Khas (JPK) RUU IPCMC, pihak-pihak berkepentingan terutamanya Polis Diraja Malaysia (PDRM) serta hasil lawatan delegasi Malaysia ke United Kingdom pada bulan Februari 2020 yang lalu.

Rang Undang-Undang Suruhanjaya Bebas Tatakelakuan Polis (IPCC) ini telah dibentangkan di Parlimen untuk bacaan kali pertama pada 26 Ogos 2020 yang lalu.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB PUAN P. KASTHURIRAANI (BATU KAWAN)

TARIKH : 3 NOVEMBER 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan berapa perbelanjaan Kerajaan setakat ini untuk ujian COVID-19 di penjara dan pusat tahanan, bilangan banduan dan tahanan yang telah diuji serta bilangan yang positif setakat ini dan nyatakan pembaharuan atau 'reform' dalam rancangan pihak Kerajaan untuk memulihara penjara dan pusat tahanan di Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan kepada statistik Jabatan Penjara Malaysia, jumlah banduan dan tahanan yang telah dibuat saringan COVID-19 dari 29 Ogos 2020 sehingga 21 Oktober 2020 adalah seramai 25,734 banduan. Dalam tempoh tersebut iaitu pada 21 Oktober 2020 seramai 1,434 banduan telah disahkan positif COVID-19.

Kementerian Dalam Negeri (KDN) telah dimaklumkan oleh Kementerian Kesihatan Malaysia (KKM) bahawa sehingga tempoh tersebut pihak KKM telah membelanjakan sebanyak RM194 juta secara keseluruhan termasuk penjara dan pusat tahanan dalam melaksanakan ujian COVID-19 yang melibatkan pembelian reagen dan *test kit*, penghantaran sampel serta *outsourcing* perkhidmatan makmal swasta.

Jabatan Penjara Malaysia melalui KDN telah memulakan rancangan dalam pelaksanaan pembaharuan sistem penjara atau transformasi penjara yang antaranya akan membolehkan 2/3 banduan sabitan yang layak, menjalani pemulihan di luar penjara menjelang 2030. Ini adalah selaras dengan fungsi dan konsep sesebuah penjara yang bertujuan untuk membangunkan semula insan dan mengintegrasikan semula ke dalam masyarakat.

Berasaskan sasaran tersebut, pencapaian serta proses yang sedang dalam tindakan adalah seperti berikut:

- i. Pada ketika ini daripada 22,000 banduan yang layak (2/3 dari banduan yang layak) sebanyak 16.8% sedang mengikuti Program Parol, Perintah Kehadiran Wajib dan Program Reintegrasi Penghuni Industri di luar penjara;
- ii. Melalui kejayaan yang telah dicapai dalam Sistem Parol dan Perintah Kehadiran Wajib yang sedang dilaksanakan, cadangan peluasan telah dibuat oleh Jabatan Penjara Malaysia yang melibatkan pindaan kepada Peraturan-Peraturan Penjara 2000 serta pindaan kepada tempoh hukuman bagi Perintah Kehadiran Wajib;
- iii. Jabatan Penjara Malaysia juga telah mula melaksanakan ketetapan berasaskan pindaan kepada Peraturan 111(1), Peraturan-Peraturan Penjara 2000 melalui program Pelepasan Banduan Secara Lesen (PBSL) untuk banduan yang mana hukumannya kurang dari setahun. Melalui program tersebut, banduan yang memenuhi syarat pemilihan boleh mengikuti program seperti program latihan pekerjaan di sektor perkilangan, pembuatan, pembinaan, perkhidmatan dan pertanian. Lembaga Pembebasan Banduan Secara Lesen yang ditubuhkan oleh Jabatan Penjara Malaysia, telah melibatkan keahlian daripada pihak luar selain daripada penglibatan pihak Jabatan Penjara Malaysia. Melalui mesyuarat pertamanya pada awal Oktober 2020, Lembaga PBSL telah menilai laporan untuk 1,200 banduan yang layak dan telah mengesyorkan kepada Komisioner Jeneral Penjara sejumlah banduan yang wajar diberikan pelepasan banduan secara lesen. Untuk makluman

Ahli Yang Berhormat, pada ketika ini terdapat sekitar 11,000 banduan yang sedang menjalani hukuman pemenjaraan kurang dari setahun.

- iv. Memperkemaskan lagi latihan kemahiran vokasional, latihan bersijil serta sistem latihan pekerjaan di dalam penjara bagi membolehkan banduan yang layak, dipertimbangkan untuk mengikuti program pekerjaan dan program Reintegrasi Penghuni Industri. Peluang pekerjaan adalah antara faktor utama yang mampu membendung pengulangan kes jenayah dan residivis;
- v. Begitu juga sistem pemulihan yang sedang dilaksanakan telah diperkemaskan dengan pelbagai ujian psikologi yang bersesuaian dengan kategori banduan berkenaan untuk melihat kesediaan penerimaan pemulihan, kesesuaian bentuk pemulihan dan tahap risiko seseorang banduan;
- vi. Cadangan yang melibatkan *Probation* dan *Community Correction* yang melibatkan beberapa alternatif kepada hukuman pemenjaraan sedang dalam penilaian oleh Agensi yang berkaitan dengan perundangan. Jika dipersetujui tatacara pelaksanaan yang melibatkan syarat dan prosedur operasi standard (*SOP*) akan disediakan oleh Jabatan Penjara Malaysia; dan
- vii. Seramai lebih kurang 300 banduan terlibat dalam pelaksanaan program penempatan semula banduan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 3 NOVEMBER 2020 (SELASA)

SOALAN

TUAN WONG HON WAI [BUKIT BENDERA] minta **MENTERI KANAN PERDAGANGAN ANTARABANGSA DAN INDUSTRI** menyatakan apakah kemajuan perundangan Penginapan Kediaman Jangka Pendek ataupun '*Short Term Residential Accommodation (STRA)*' termasuk '*homestay*' dan '*Airbnb*' yang sedang digariskan dan sama ada ia akan dilesenkan dan seterusnya pengutipan cukai dan penguatkuasaan yang akan dilaksanakan terhadap STRA.

JAWAPAN

Tuan Yang Di Pertua,

1. Isu *Airbnb* adalah berkaitan industri pelancongan dan di bawah bidang kuasa Kementerian Pelancongan, Seni dan Budaya Malaysia (MOTAC). Walau bagaimanapun, Perbadanan Produktiviti Malaysia (MPC), agensi di bawah MITI melalui Nexus Produktiviti Pelancongan telah diberi mandat sebagai pemudahcara untuk mengkaji dan menyemak semula peraturan perniagaan yang mengekang pertumbuhan produktiviti dan daya saing industri pelancongan negara, terutamanya impak STRA kepada industri perhotelan yang dibangkitkan oleh pihak industri dalam Nexus Produktiviti Pelancongan.

2. Oleh itu, MPC dengan kerjasama Kementerian Perumahan dan Kerajaan Tempatan (KPKT) dan Kementerian Pelancongan, Seni dan Budaya Malaysia (MOTAC) telah membangunkan suatu garis panduan bagi membantu agensi pengawal selia menangani isu-isu berkaitan aktiviti penginapan kediaman jangka pendek di kawasan kediaman atau (STRA) yang menggunakan model perniagaan baharu melalui aplikasi-aplikasi tertentu. Garis Panduan ini mengandungi rangka kerja kawal selia bersepadu bagi menyokong pertumbuhan industri pelancongan di samping melindungi kepentingan pengguna, komuniti kejiranan dan pengusaha STRA.

3. Garis Panduan ini dibangunkan berdasarkan kajian penandarasan serta maklum balas yang diterima melalui sesi libat urus bersama pihak berkepentingan seperti industri perhotelan, pengusaha platform digital (dalam dan luar negara), operator STRA, pengusaha *homestay*, persatuan dan pengusaha pelancongan, masyarakat setempat dan Badan Pengurusan Bersama (JMB), akademik, serta agensi pengawal selia di peringkat Kerajaan Persekutuan, Negeri dan Pihak Berkuasa Tempatan. Sebanyak lebih 700 interaksi, 240,000 tayangan media sosial dan enam (6) liputan media dalam tempoh perundingan awam telah diadakan di antara Oktober hingga November 2019. Antara aspek-aspek yang diambil kira dalam Garis Panduan ini adalah:

- a) mengawal selia aktiviti STRA di kawasan perumahan;
- b) mengawal selia isu kacau ganggu awam;
- c) memperkasakan keselamatan dan perlindungan di kawasan perumahan;
- d) penjana hasil negara menerusi kutipan cukai daripada pihak-pihak terlibat; dan
- e) menangani kebimbangan industri perhotelan atas rungutan ketidaksaksamaan.

4. Garis Panduan STRA ini masih dalam perbincangan antara semua pihak berkepentingan termasuklah MOTAC, KPKT, Lembaga Hasil Dalam Negeri dan pihak berkuasa tempatan. Hasil impak analisis yang telah dijalankan oleh MPC antaranya menunjukkan bahawa akan terdapat peningkatan kos perniagaan sekiranya Kerajaan bercadang untuk melaksanakan Garis Panduan ini, khususnya cadangan melesenkan tuan rumah dan ejen (*host and agent*), termasuk keperluan untuk mendaftar mereka sebagai entiti perniagaan. Peningkatan kos ini lebih membebankan tuan rumah dan ejen di kalangan pengusaha warga tua dan mereka yang berada di kawasan luar bandar. Antara kos yang terlibat adalah kos pelesenan dan kos untuk memenuhi syarat strata bangunan komersial, termasuk pematuhan kepada syarat-syarat yang ditetapkan oleh pihak Jabatan Bomba dan Keselamatan, PBT dan Jawatankuasa Pengurusan Bersama atau JMB. Selain itu, terdapat juga beberapa syarat di bawah Garis Panduan STRA ini yang mungkin menimbulkan kesukaran untuk dilaksanakan oleh agensi penguatkuasaan. Ini berikutan definisi yang tidak jelas mengenai aktiviti "komersial" dan bangunan "kediaman" terutamanya isu pemilikan strata.

5. Oleh yang demikian, Kerajaan kini sedang meneroka kaedah terbaik untuk menyeimbangkan pelaksanaan Garis Panduan ini agar ia tidak membebankan aktiviti perniagaan yang diusahakan oleh rakyat tempatan, khususnya mereka yang berpendapatan rendah dan mencari sumber pendapatan tambahan melalui aktiviti STRA.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 3 NOVEMBER 2020 (SELASA)

SOALAN

**TENGKU ZULPURI BIN RAJA PUJI [RAUB] minta MENTERI ALAM
SEKITAR DAN AIR menyatakan :-**

- (a) senarai serta perincian status kerja (progres) JPS terkini khasnya di Parlimen Raub; dan
- (b) nyatakan dengan terperinci peruntukan dan perbelanjaan jabatan pengaliran dan saliran untuk tempoh 2017 sehingga kini bagi negeri Pahang.

JAWAPAN

Tuan Yang Di-Pertua,

1. Kementerian telah menyalurkan peruntukan di seluruh Negara termasuklah di Negeri Pahang khususnya di Parlimen Raub untuk melaksanakan kerja-kerja sebutharga kecil dengan kos peruntukan berjumlah **RM2,038,000** bagi tahun 2020. Antara projek-projek yang telah dan sedang dilaksanakan di Parlimen Raub adalah Program Pemuliharaan Sungai Untuk Mengurangi Risiko Banjir Pelbagai Negeri dengan peruntukan berjumlah **RM550,000**, Kerja-kerja Penyelenggaraan Kolam Takungan Banjir sebanyak **RM295,000** dan juga Kerja-Kerja Pemuliharaan Sungai Dan Tebatan Banjir Seluruh Malaysia dengan kos peruntukan sebanyak **RM1.193 juta**.

NO. SOALAN : 57

2. Bagi Negeri Pahang, dari tahun 2017 hingga 2020, Kementerian telah menyalurkan peruntukan kepada JPS Negeri Pahang sebanyak RM462,133,847.00 dan perbelanjaan yang telah dibuat sehingga 21 Oktober 2020 adalah sebanyak RM435,790,833.48.

3. Senarai projek- projek pemuliharaan sungai untuk mengurangkan risiko banjir tahun 2020 di Raub Pahang seperti berikut:

BIL	PROJEK	KOS PROJEK (RM)	STATUS PROJEK
1.	Kerja-kerja Pemuliharaan Sungai Untuk Mengurangkan Risiko Banjir Serta Kerja-kerja Berkaitan Di Anak Sungai Rotan Tunggal, Mukim Gali 1, Daerah Raub, Pahang Darul Makmur.	RM 100,000	Tarikh Mula : 13/7/2020 Tarikh Siap: 21/9/2020 Status Projek: 100% Siap
2.	Kerja-kerja Pemuliharaan Sungai Untuk Mengurangkan Risiko Banjir Serta Kerja-kerja Berkaitan Di Sungai Chenaan dan Sg. Sejuk Kg. Kuala Atok, Mukim Sega, Daerah Raub, Pahang Darul Makmur.	RM 100,000	Tarikh Mula : 3/8/2020 Tarikh Siap: 12/10/2020 Status Projek: 83% siap
3.	Kerja-kerja Pemuliharaan Sungai Untuk Mengurangkan Risiko Banjir Serta Kerja-kerja Berkaitan Di Sungai Gali, Mukim Gali, Daerah Raub, Pahang Darul Makmur.	RM 200,000	Tarikh Mula : 13/7/2020 Tarikh Siap: 7/9/2020 Status Projek: 100% Siap
4.	Kerja-kerja Pemuliharaan Sungai Untuk mengurangkan Risiko Banjir Serta Kerja-kerja Berkaitan Di Sungai Lipis, Kg Batu Malim, Mukim Batu Talam, Daerah Raub, Pahang Darul Makmur.	RM 150,000	Tarikh Mula : 13/7/2020 Tarikh Siap: 24/8/2020 Status Projek: 100% Siap
JUMLAH		RM 550,000	

NO. SOALAN : 57

4. manakala bagi kerja-kerja penyenggaraan kolam takungan banjir tahun 2020 di Raub, Pahang seperti berikut:

BIL	PROJEK	KOS PROJEK (RM)	STATUS PROJEK
1.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Taman Tasik Raub (Kolam 1) Raub,Pahang	RM 116,000	Tarikh Mula : 03.08.2020 Tarikh Siap: 26.10.2020 Status Projek: 50% Siap sehingga 30/9/2020.
2.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Taman Tasik Raub (Kolam 2) Raub,Pahang	RM 45,000	Tarikh Mula : - Tarikh Siap: - Status Projek: Dalam peringkat penyediaan dokumen sebutharga.
3.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Sg Lui ,Raub,Pahang	RM 25,000	Tarikh Mula : 13.07.2020 Tarikh Siap: 21.09.2020 Status Projek: 50% Siap sehingga 30/9/2020.
4.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Taman Impian Villa, Raub,Pahang	RM 49,000	Tarikh Mula : 13/7/2020 Tarikh Siap: 24/8/2020 Status Projek: 100% Siap.

NO. SOALAN : 57

5.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Taman Lily, Raub,Pahang	RM 25,000	Tarikh Mula : - Tarikh Siap: - Status Projek: Dalam peringkat penyediaan dokumen sebutharga.
6.	Kerja-Kerja Menaiktaraf Serta Kerja-Kerja Berkaitan Di Kolam Takungan Banjir Taman Amalina Saujana Raub,Pahang	RM 35,000	Tarikh Mula : 13.07.2020 Tarikh Siap: 21.09.2020 Status Projek: 100% Siap.
JUMLAH		RM 295,000	

Sekian, terima kasih